

LAI KRUB

(Leviticus)

1 *Grawng Krax Tan Pa Gleeing*

Siyiex kok ka Mose mai sikah ka nawh khaing daux nyiex gox buan ah nin, ²“Krai ka ceu pui Isarelah ah nin, ka daux pex yam viex pui tix kaux kaux krax tan ka Siyiex, nawh tak viex ti tan tobrie pa mawh mawie, yung mai pex khankix. ³Phan nawh sang yuh krax tan pa gleeing ka mawie, kieh nawh tan mawie mhaing pa loig ka diang siviex nyiex gox buan man bang kum pui hun sonsang mawh pa khawcaw sivoie ngai Siyiex. ⁴Nawh tak deuh taix tix piang kaing mawie an mai an tak mawh pa pon rieb ti teei son pa sang pluatploi phimap nawh. ⁵Nawh tak pah mawie mhaing an sivoie Simiang Siyiex, mai kawn simex Arun cao giex kaing li khankix tak teei nham mai phruah hawt rawb vungviang piang khu dee tan, pa koe hawt diang siviex nyiex gox buan man bang kum pui hun. ⁶Nawh tak lieh mawie krax tan pa gleeing an mai tat nex an lih khik mawx khik an, ⁷Kawn simex Arun pa mawh cao giex kaing li khankix tak phlu ngu piang khu dee tan mai nawm khix piang ngu an ⁸mai kawn simex Arun pa mawh cao giex kaing li khankix tak teei khik nex mawie khawm kaing, khawm bee mai deuh piang khix pa koe ngu piang khu dee tan ⁹mai nawh tak sigrah kraung vaig mai caong ka rawm, cao giex kaing li tak gleeing an khawmuik piang khu dee tan, kieh mawh krax tan pa gleeing ka ngu, pa sioe bhawng ka Simiang Siyiex. ¹⁰Phan nawh sang yuh krax tan pa gleeing ka yung, phan ang mawh nan ka pex khankix mai tak tan mhaing pa loig, ¹¹nawh tak pah an ka plak blaong khu dee tan sivoie Simiang Siyiex mai kawn simex Arun pa mawh cao giex kaing li khankix tak phruah nham hawt rawb vungviang piang khu dee tan khawmuik. ¹²Nawh tak tat nex totan an lih khik mawx khik an mai bee nawh, cao giex kaing li tak teei ti deuh piang nawm khix

pa koe ngu piang khu dee tan ¹³mai nawh tak sigrah kraung vaig mai caong khankix ka rawm, cao giex kaing li tak viex nawh khawmuik mai gleeing piang khu dee tan, kieh mawh krax tan pa gleeing ka ngu pa sioe bhawng ka Simiang Siyiex, ¹⁴phan nawh sang yuh krax tan pa gleeing ka sim khankix mai nawh tak viex pa mawh keukie, phan ang mawh nan, kawn sikaux nhum. ¹⁵Cao giex kaing li tak viex hoek ka khu dee tan mai siyiied kaing nawh dud mai gleeing nawh piang khu dee tan, mai tak biiet nham lih hawt praok khu dee tan ¹⁶mai nawh tak pih ti tik ble mai can pa seeing, hu tik ka dee tik nyaox, ka praok khu dee tan plak toh, ¹⁷nawh tak giex prui sim an khawm hauk mai lug naok nawh son ang dud khaing paox tix mai cao giex kaing li tak teei tix gleeing piang nawm khix pa koe ngu piang khu dee tan, kieh mawh krax tan pa gleeing ka ngu, pa sioe bhawng ka Simiang Siyiex heue.

2 *Krax Tan Ceu Pa Ih*

Yam pui tix kaux kaux tan ceu pa ih ka Siyiex, kieh nawh viex phawng ngox ca im pa mhawm mai see bee piang phawng nghox ca im an mai baox sau lawpan kah, ²nawh tak viex an kix hoek ka sivoie ngai kawn simex Arun pa mawh cao giex kaing li khankix mai cao giex kaing li tak teei phawng nghox ca im tix jhawp mai bee tixblauh mai lawpan pa koe uik, khaix an tak kieh ceu in mawh pa dohkeud mai gleeing piang khu dee tan, kieh mawh krax tan pa gleeing ka ngu pa sioe bhawng ka Siyiex. ³Krax tan ceu pa ih pa kawn deuk tak mawh son Arun mai kawn simex nawh khankix, an mawh krax tan pa nie blon singax singeh khaing paox tix khaing daux pa tan ka Siyiex pa gleeing ka ngu. ⁴Phan maix sang yuh krax tan ceu pa ih pa ping daux glah ngu, an tak mawh blauh pa ang sau susaix mai pa yuh ti ka phawng nghox ca im pa mhawm pa hoik klao ka bee, phan ang

mawh nan blauh rhi khlawp pa ang sau susaix mai pa hoik klao tix ka bee, ⁵phan maix sang yuh krax tan ceu pa ih pa ping ka diang rhiem, an tak mawh phawng nghox ca im ceu pa mhawm pa ang sau susaix pa hoik klao tix ka bee, ⁶maix tak sivit blauh an lih mawh blich mawx blich an mai see bee piang an, in mawh krax tan ceu pa ih. ⁷Phan maix sang yuh krax tan ceu pa ih, diag dauw aw khang, an tak mawh pa yuh ti ka phawng nghox ca im pa mhawm tau mai bee. ⁸Maix tak viex krax tan ceu pa ih pa hoik yuh tix ka ceu inkix ka Simiang Siyix mai ap ka cao giex kaing li, nawh tak viex an hoek ka khu dee tan. ⁹Cao giex kaing li tak teei khaing dauw krax tan ceu pa ih an tix nyum, sonsang mawh krax tan pa dohkeud mai gleeing piang khu dee tan, kieh mawh krax tan pa gleeing ka ngu mai pa sioe bhawng ka Siyix. ¹⁰Krax tan ceu pa ih pa kawn deuk khankix, tak mawh son Arun mai kawn simex nawh khankix, an mawh krax tan pa nie blon singax singeh khaing paox tix khaing dauw pa tan ka Siyix pa gleeing ka ngu. ¹¹Krax tan ceu pa ih pa viex maix hoek ka Siyix tak ang sau susaix ka dauw krax tan pa gleeing ka Siyix, maix tak ang yaox ti gleeing susaix mai rawm hia kah. ¹²Maix tak yaox ti viex krax tan plix liang pa pon tix hoek ka Siyix, viang mawh nan maix tak ang pon ti gleeing piang khu dee tan sonsang mawh pasioe bhawng. ¹³Ka dauw krax tan ceu pa ih pa yuh maix kuceu, maix tak sau kih kah, maix tak ang pon ti kieh kih sijax mukheu Siyix maix ceet khaing ka dauw krax tan ceu pa ih maix, ceu pa tan maix khawmuik, maix tak sau kih kah, ¹⁴phan maix sang tan plix pa liang maix tix pon pa mawh krax tan ceu pa ih ka Siyix, maix tak teei sigleem nghox mai ka praok ngu mai boi ti teei plix nawh. ¹⁵Maix tak sau bee piang an mai baow sau lawpan piang an, an mawh krax tan ceu pa ih. ¹⁶Cao giex kaing li tak gleeing son krax pa dohkeud khaing sigleem nghox pa hoik boi an tix nyum pa mawh bee tau mai lawpan, in mawh krax tan pagleeing kangu son Simiang Siyix heue.

3 *Krax Tan Pa Nhim*
 “Phan pui tix kaux kaux yuh krax tan pa nhim mai kieh nawh tan mawie mhaing, phan ang mawh nan mawie shiang pa mhawm loig tix mu mu ka plak sioe Simiang Siyix. ²Nawh tak deuh taix tix piang mawie pa sang tan an mai pah hawt diang siviex nyiex gox buan man bang kum mai kawn simex Arun pa mawh cao giex kaing li tak phruah nham hawt rawb vungviang piang khu dee tan. ³Nawh tak teei bee pa kheem kraung vaig khawmuik, pa mawh krax tan pa nhim mai krax tan gleeing ka ngu son Siyix, ⁴soklax ra mu pa koe ka dauw nyoi mai bee pa koe piang an mai bee pa kawb tawm khankix tak teei lih. ⁵Kawn simex Arun khankix tak gleeing an kix piang khu dee tan piang nawm khix pa koe ngu, kieh mawh krax tan pa gleeing ka ngu, pa sioe bhawng ka Simiang Siyix. ⁶Phan sang tan krax tan pa nhim ka Siyix, pa mawh yung, pex, kieh nawh tan pa mawh mhaing phan ang mawh nan shiang pa mhawm loig tix mu mu. ⁷Phan nawh sang yuh krax tan ka kawn yung tix mu, nawh tak ap an sioe Simiang Siyix, ⁸nawh tak deuh taix tix piang kaing yung pa sang tan an mai pah an sioe nyiex gox buan man bang kum mai kawn simex Arun khankix tak phruah nham ankix piang vung viang khu dee tan. ⁹Nawh tak yuh krax tan khaing krax tan pa nhim an, pa mawh krax tan pa gleeing ka ngu ka Siyix, tak teei khlawp bee totan an, bee pa kawb si-ang krawng tom hoek ka sidax mai bee pa kheem kraung vaig mai can bee pa koe piang kraung vaig khawmuik, ¹⁰soklax ra mu pa koe ka nyoi totan mai bee pa koe piang an mai bee pa kawb ka tawm khankix tak teei lih, ¹¹mai cao giex kaing li tak gleeing an kix, piang khu dee tan awm priex pa mawh krax tan, pa hoik gleeing ti ka ngu son Siyix. ¹²“Phan nawh sang yuh krax tan ka pex tix mu, nawh tak ap sioe Simiang Siyix, ¹³Nawh tak deuh taix tix piang kaing pex an mai pah ka sioe nyiex gox man bang kum mai kawn simex Arun khankix tak phruah nham ankix hawt rawb vungviang piang khu dee tan. ¹⁴Nawh tak tan khaing an, awm krax tan pa gleeing ka ngu ka Siyix mai bee pa kheem

piang kraung vaig mai can bee pa koe piang kraung vaig khawmuik, ¹⁵ soklax ra mu pa koe ka nyoi totan mai bee pa koe piang an mai bee pa kawb piang tawm khankix tak teei lih ¹⁶ mai cao giex kaing li tak gleeing ankix piang khu dee tan awm priex pa mawh krax tan pa hoik gleeing ka ngu pa sioe bhawng. Bee khawmuik mawh cie Siyiex. ¹⁷ In tak mawh gumlox pingnyap leeingju ka dahdee ot doeh ru maix kudahdee, pex tak ang pon ti ih bee mai nham heue.”

4 *Krax Tan Pa Pluatploi Phimap*

Simiang Siyiex ah nin ka Mose, ² “Krai ah nin ka pui Isarela khankix, phan pui tix kaux kaux lud ka gumlox pingnyap Siyiex ka dau pa ang nawh khaw ti yuh tix ceuceu ³ mai phan cao giex kaing li pa hoik pon pa groi rawm bee kieh pui lud yuh phimap awm lud yuh tix, kieh nawh viex krax tan ka mawie mhaing pa loig son krax tan pa pluatploi phimap ka sivoie Simiang Siyiex, ⁴ nawh tak viex mawie mhaing hoek ka diang siviex nyiex gox buan man bang kum ka sivoie Simiang Siyiex, nawh tak deuh taix tix piang kaing mawie an mai pah ka sivoie Simiang Siyiex. ⁵ Cao giex kaing li pa hoik groi rawm bee kah, tak teei nham mawie an tixblah mai viex hoek ka nyiex gox buan man bang kum, ⁶ cao giex kaing li tak cub giien taix tix ka dau nham mai phruah nham aliah bawg ka sivoie Simiang Siyiex, sivoie man tie dee pa singax singeh. ⁷ Cao giex kaing li tak sau nham tixblah piang rung khu dee tan nyawng bhawng ka sivoie Simiang Siyiex, pa koe ka dau nyiex gox buan man bang kum mai nham mawie pa kawm deuk an, nawh tak hieh ka caong khu dee tan, krax tan pa gleeing, pa koe ka diang siviex nyiex gox buan man bang kum. ⁸ Nawh tak teei bee khawmuik khaing mawie mhaing pa mawh krax tan pa pluatploi phimap, can bee pa kawb piang kraung vaig mai can bee pa koe piang kraung vaig khawmuik, ⁹ soklax ra mu pa koe ka nyoi totan mai bee pa koe piang an mai bee pa kawb piang tawm khankix tak teei lih, ¹⁰ awm pa hoik teei tix khaing mawie mhaing pa tan tix son krax

tan pa nhim mai cao giex kaing li tak gleeing an kix piang khu dee tan pa tan krax tan pa gleeing. ¹¹ Viang mawh nan, hak mawie mai nex khawmuik tau mai kaing, caong, khawm kraung vaig khankix mai roing, ¹² nawh tak viex mawie an khawm mu lih hu ka plak praix nyiex bang ka dee hoik yuh kix blang, ka dee tik nyaox mai gleeing piang nawm khix pa koe ngu mai gleeing ka dee tik kix nyaox tan. ¹³ Phan pui haohhun Isarela khankix ludloe ka dau pa ang ti tawng mai can pa glip ka plak sivoie pui hun mai lud ka gumlox pingnyap mai an lih mawh pa lud, ¹⁴ yam deeh tawng kix ka phimap pa hoik lud tix mai pui haohhun tak tan mawie mhaing tix mu son krax pa pluatploi phimap mai viex hoek ka sivoie nyiex gox buan man bang kum, ¹⁵ mai kuad song cub pui haohhun khankix tak deuh taix tix piang kaing mawie an sivoie Simiang Siyiex mai pah mawie mhaing an ka sivoie Simiang Siyiex. ¹⁶ Cao giex kaing li pa hoik groi rawm bee kah, tak viex nham mawie an tixblah hoek ka nyiex gox buan man bang kum ¹⁷ mai cao giex kaing li tak cub giien taix tix ka dau nham mai phruah aliah bawg ka sivoie Simiang Siyiex ka plak sivoie man tie. ¹⁸ Nawh tak sau nham tixblah piang rung khu dee tan pa koe sivoie Simiang Siyiex, ka dau nyiex gox buan man bang kum mai nham pa kawm deuk an, tak hieh ka caong khu dee tan krax tan pa gleeing, pa koe hawt diang siviex nyiex gox buan man bang kum. ¹⁹ Nawh tak teei khlawp bee khawmuik khaing mawie mai gleeing piang khu dee tan. ²⁰ Nawh tak shiao mawie mhaing an, awm pa hoik shiao ti ka mawie mhaing pa tan kix son krax tan pluatploi phimap mai nawh tak yuh awm an, mai cao giex kaing li tak yuh krax khioxkhaw son kix mai kix tak pon krax pluatploi phimap. ²¹ Nawh tak viex mawie lih plak praix dee bang kix ti ot mai gleeing awm mawie phaoka, an mawh krax tan pa pluatploi phimap son pui hun. ²² Phan cao pa kuang tix kaux kaux ludloe ka dau pa ang ti tawng mai can pa glip ka gumlox pingnyap Siyiex ka dau pa ang nawh khaw ti yuh ka plak sivoie pui haohhun mai lud ka gumlox pingnyap mai

an lih mawh pa lud,²³ Phan nawh hoik tawng dee lud tix, nawh tak viex krax tan pa pluatploi phimap ka kawnpex mhaing paloig tix mu son phimap pa hoik yuh tix.²⁴ Nawh tak deuh taix tix piang kaing kawnpex mhaing an mai pah ka dee gleeing kix krax tan pa gleeingsivoe Simiang Siyiex, in mawh krax tan son krax pluatploi phimap.²⁵ Cao giex kaing li tak teei nham tixblah khaing krax tan pa pluatploi phimap ka giien taix tix mai sau piang rung khu dee tan pa gleeing mai nham pa kawndeuk an tak hieh ka caong khu dee tan krax tan pa gleeing.²⁶ Nawh tak gleeing bee khawmuik piang khu dee tan awm bee pa hoik appong ti tan son krax tan pa nhim mai cao giex kaing li tak khioxkhaw son phimap pa yuh nawh mai nawh tak pon krax pluatploi.²⁷ Phan pui pa hot sia tix kaux kaux daux pui lsarela ludloe ka daux pa ang ti tawng mai can pa glip ka plak sivoe ngai pui hun mai lud ka gumlox pingnyap mai an lih mawh pa lud,²⁸ phan nawh hoik tawng dee lud tix, nawh tak viex krax tan pa pluatploi phimap ka kawnpex shiang pa loig tix mu son phimap pa hoik yuh tix.²⁹ Nawh tak deuh taix tix piang kaing pex, krax tan pa pluatploi phimap an mai pah ka dee gleeing kix krax tan pa gleeing.³⁰ Cao giex kaing li tak teei nham tixblah ka giien taix tix mai sau piang rung khu dee tan pa gleeing, nham pa kawndeuk an tak hieh ka caong khu dee tan krax tan pa gleeing.³¹ Nawh tak teei bee an lih awm teei bee khaing krax tan pa nhim mai cao giex kaing li tak gleeing an piang khu dee tan, son krax tan pa sioe bhawng ka Siyiex mai cao giex kaing li tak khioxkhaw son nawh mai nawh tak pon krax pluatploi phimap.³² Phan nawh viex kawnyung son krax tan pa pluatploi phimap, kieh nawh viex kawnyung shiang pa loig tix mu,³³ nawh tak deuh taix tix piang kaing kawnyung krax tan pa pluatploi phimap an mai pah son krax tan pa pluatploi phimap ka dee pah kix krax tan pa gleeing.³⁴ Khaix an, cao giex kaing li tak teei nham tixblah khaing

4:27-31 Si 15:27-28.

krax tan pa pluatploi phimap ka giien taix tix mai sau piang rung khu dee tan ka krax tan pa gleeing, nham pa kawndeuk tak hieh ka caong khu dee tan krax tan pa gleeing.³⁵ Nawh tak teei bee an lih, awm teei bee khaing kawnyung krax tan pa nhim mai cao giex kaing li tak gleeing an piang khu dee tan awm krax tan pa hoik gleeing ka ngu ka Siyiex, cao giex kaing li tak yuh krax khioxkhaw son phimap pa hoik lud nawh mai nawh tak pon krax pluatploi phimap heue.”

5 *Krax Tan Son Krax Lud*

“Phan pui tix kaux kaux mhong lox pa tiextu tix ceu mai nawh mawh mhairug an mai phan nawh yaox ka an mai tawng ka grawng an, phan nawh ang krai, nawh tak yaox ti kham ka phimap.² Phan pui tix kaux loe ti teeh ka tobrie he mai tobrie nge pa ang singax tix ceuceu, pa mawh tobrie yum pa ang singax khankix angah, tobrie yum canceu pa chix mu angah mai pa ang tien yaox ankix, nawh lih ti mawh pa ang singax, nawh tak lud.³ Phan nawh loe ti teeh ka ceu pa ang singax, pa koe ka pui khankix mai an lih mawh pa kieh nawh seeing, khaix hoik tawng nawh ka an, nawh tak lih mawh pa lud.⁴ Phan pui tix kaux kaux tiextu mai ang koe krax keud, sonsang yuh ceu pa caox angah, ceu pa mhawm angah mai pa hoik tiextu pui tix kaux ka nawh, ka ceu pa ang nawh tien tawng ka sivoe nawh khankix, yam hoik deeh tawng nawh grawng an, nawh tak lih koe pa lud ka grawng an.⁵ Yam hoik koe krax lud nawh ka grawng ceu an khankix, nawh tak yaox ti krai phimap tix sidawng mai khioxkhaw,⁶ nawh tak viex krax tan son phimap pa hoik yuh ti ka kawnyung shiang tix mu, phan ang mawh nan, kawnpex shiang tix mu ka Siyiex, son krax tan pa pluatploi phimap tix, cao giex kaing li tak khioxkhaw son phimap pa hoik yuh nawh.⁷ Phan nawh ang pon tan kawnyung iak, nawh tak teei ti tan sikaux ra mu phan ang mawh nan, kawnukeukie ra mu ka Simiang Siyiex, son krax lud pa hoik yuh tix, tix mu mawh son krax tan pluatploi phimap mai tix mu mawh son krax tan pa gleeing.⁸ Nawh tak viex an hoek

ka cao giex kaing li mai cao giex kaing li tak tan krax tan pa pluatploi phimap phaoka mai siyiied kaing khaing ngawg an, viang mawh nan, ang pon ti kieh dud, ⁹nawh tak phruah nham krax tan pa pluatploi phimap tixblauh ka praok khu dee tan mai nham pa kawn deuk tak biiet ka caong khu dee tan, in mawh krax tan pa pluatploi phimap. ¹⁰Nawh deeh tan sim ra mu tix mu son krax tan pa gleeing awm pa hoik koe lox tawm pingnyap mai cao giex kaing li tak yuh krax khioxkhaw tang nawh mai son phimap pa hoik lud nawh mai nawh tak pon krax pluatploi phimap. ¹¹Phan nawh ang pon viex sikaux ra mu, keukie ra mu angah, pui pa hoik lud an, tak viex phawng gaonghox ca ceu pa mhawm kao son tix son, khaing tix epha hoek son krax pluatploi phimap, nawh tak ang pon ti sau bee mai lawpan piang, kheu mawh an krax tan pa pluatploi phimap. ¹²Nawh tak viex an hoek ka cao giex kaing li mai cao giex kaing li tak teei phawng nghox ca tix jhawp sonsang mawh pa dohkeud mai gleeing an piang khu dee tan, awm krax tan pa gleeing ka ngu son Simiang Siyiex, in mawh krax tan pa pluatploi phimap. ¹³Cao giex kaing li tak yuh krax khioxkhaw son phimap pa hoik lud nawh ka grawng tix ceuceu, nawh tak pon krax pa pluatploi mai pa kawn deuk khankix tak mawh cie cao giex kaing li, awm krax tan ceu pa ih heue.”

Krax Tan Pa Pluatploi Krax Lud

¹⁴ Siyiex krai ah nin ka Mose, ¹⁵“Phan pui tix kaux kaux lud ka ceu pa ang ti tien tawng ka ceu pa ang tix tien tawng ka ceu pa singax singeh Siyiex mai lih ti mawh phimap, nawh tak viex kawn yung mhaing, phan ang mawh nan, kawn pex mhaing pa loig hoek ka Siyiex tix mu sonsang mawh krax tan pa pluatploi krax lud, maix tat jum tobrie an ka mau shekhe pa hoik ciang tix ka jiang dee pa singax singeh, in mawh krax tan pa pluatploi pa lud. ¹⁶Kieh nawh viied son pa ludloe nawh ka kraung pa dex mai dee pa singax singeh mai nawh tak deeh baox thie

piang an phuan son tix son mai ap ka cao giex kaing li, cao giex kaing li tak yuh pa khioxkhaw son nawh, ka kawn yung son krax tan pa pluatploi pa lud, nawh tak pon krax pluatploi. ¹⁷Phan pui tix kaux kaux ludloe ka lox tawm Simiang Siyiex pa ang kieh nawh yuh tix ceuceu, viang nawh ang tawng pa yuh tix lud kawx, nawh hoik lud mai tak yaox ti kham geu son phimap an. ¹⁸Nawh tak yaox ti viex kawn yung mhaing, phan ang mawh nan, kawn pex mhaing pa loig tix mu ka cao giex kaing li tau mai mau ngawh viied son krax tan pa lud tix mai son pa ang nawh koe krax tawng yung, ka daux pa hoik ludloe tix, cao giex kaing li tak yuh pa khioxkhaw ka son nawh, nawh tak pon pa pluatploi. ¹⁹An mawh krax tan pa pluatploi krax lud, mawh kheu hoik lud nawh ka Simiang Siyiex heue.”

6 Khaix an Simiang Siyiex krai ah nin ka Mose, ² “Phan pui tix kaux kaux koe pa ludloe ka Siyiex ka daux pa pielhen tix ka paox plawg tix, son grawng kraung pa ap pui ti deuh angah, son kraung pa tang pui ti deuh angah, son kraung pa gut kheem angah mai son kraung pa tudrhim nawh khaing paox plawg tix angah, ³Phan nawh yaox ka ceu pa grai yuh pui mai pielhen ka grawng an mai tiextu ka pa ang mawh ang meh mai lud ka ceu pa lud pui tix ceuceu. ⁴Yam pui tix kaux kaux lud mai lih ti mawh phimap, nawh tak deeh yaox ti viied ka kraung pa ap pui ti deuh angah, kraung pa tang pui angah, kraung pa gut kheem angah, kraung pa tudrhim angah mai kraung pa grai yuh pui pa yaox nawh khankix ⁵ mai grawng pa hoik tiextu nawh ka daux pa ang mawh ang meh, nawh deeh yaox ti viied ngawh kraung tom naog mai deeh baox thie phuan son tix son piang an mai tawx an ka cao kraung ka daux singaix yuh nawh krax tan pa lud. ⁶ Nawh tak yaox ti viex kawn yung mhaing pa loig hoek ka Siyiex sivoie ngai cao giex kaing li tau mai ngawh mau pa viied tix son krax tan pa pluatploi pa lud tix. ⁷ Cao giex kaing li tak yuh krax khioxkhaw son nawh ka sivoie ngai Siyiex mai nawh tak pon krax pluatploi khaing pa lud tix kuceu.”

Been Krax Tan Pa Gleeing

⁸ Siyiex ah nin ka Mose, ⁹ "Tawx lox ka Arun mai kawn simex nawh khankix, in mawh grawng been krax tan pa gleeing, krax tan pa gleeing tak koe piang glah ngu khu dee tan leeing sawm tom hoek plak ponngawb mai kieh glah ngu khu dee tan rup jheengjheeng. ¹⁰ Cao giex kaing li tak ceep sibex man mai khlah man piang tokaux tix mai nawh tak kop nyaox krax tan pa gleeing piang khu dee tan mai deuh ka praok khu dee tan. ¹¹ Nawh tak loh kraung ceep tix mai deeh ceep kraung tang ceu mai viex nyaox an lih ka praix nyiex bang ka dee hoik yuh kix blang. ¹² Ngu pa koe piang khu dee tan tak ang pon kieh yeet tix bawg kawx, tak kieh rup jheengjheeng mai cao giex kaing li tak sau khix sau ngu piang an ku ngawb mai deuh krax tan pa gleeing piang nawm khix pa rup piang khu dee tan mai yaox ti gleeing khlawp bee krax tan pa nhim. ¹³ Ngu pa rup piang khu dee tan, tak ang pon ti kieh yeet tix bawg kawx, tak kieh rup jheengjheeng.

Been Krax tan ceu pa ih

¹⁴ "In mawh grawng been son krax tan ceu pa ih, kawn simex Arun khankix taktan an piang khu dee tan sivoe Simiang Siyiex. ¹⁵ Nawh tei an khaing krax tan ceu pa ih phawng nghox ca tix jhawp tau mai bee mai lawpan pa koe daux krax tan an khawmuik mai gleeing an piang khu dee tan sonsang mawh pa sioe bhawng pa dohkeud ka Siyiex. ¹⁶ Pa kawn deuk an Arun mai kawn simex nawh khankix tak ih blah pa ang sau susaix kix tak ih ka dee pa singax singeh ka biang nyiex gox buan man bang kum tau mai blah pa ang sau susaix. ¹⁷ An tak ang pon ti yuh sin tau mai susaix, mawh krax tan pa hoik tawx ka kix khaing krax tan pa gleeing, hoik mawh pa singax singeh, awm krax tan son pa pluatploi phimap mai krax tan pa pluatploi pa lud. ¹⁸ Can pa mawh simex ka daux kawn praix Arun khawmuik tak ih ka an, an tak mawh gumlox beenli pa hoik deuh ka son doehrux pex tix ju hoik tix ju khaing krax tan pa gleeing ka ngu son Siyiex, can pui kukaux pa teeh ka krax tan an tak caw ti mawh pa singax singeh." ¹⁹ Simiang Siyiex ah nin ka Mose, ²⁰ "In mawh krax tan Arun mai kawn

simex nawh khankix pa yaox kix ti tan phawng nghox ca im ka Siyiex jah ka daux singaix hoik kham ti rieb pa groi rawm bee ka nawh, kix taktan krax tan ceu pa ih kao son tix son khaing tix epha son krax tan ku ngaix, plak ponngawb tix plak mai plak ponbo tix plak. ²¹ Sau bee tau mai phawng blah an yuh sin ka diang rhiem hax, maix tak viex hoek mai sivit ti tan kieh mawh krax tan ceu pa ih, son krax tan pa sioe bhawng ka Siyiex. ²² Ka daux kawn simex nawh khankix, pa kham ti rieb pa groi rawm bee tang nawh, tak yuh krax tan an, in mawh gumlox pingnyap grawng krax tan ka Simiang Siyiex mai tak yaox ti gleeing khawmuik. ²³ Can krax tan ceu pa ih kuceu son cao giex kaing li khankix, tak yaox ti gleeing khawmuik, tak ang pon ti ih heue."

Been Krax Tan Son Phimap

²⁴ Khaix an, Siyiex ah nin ka Mose, ²⁵ "Krai ka Arun mai kawn simex nawh khankix, in mawh grawng been son krax tan pa pluatploi phimap, krax tan son phimap an tak yaox ti pah ka dee gleeing kix krax tan pa pluatploi phimap ka plak sivoe Simiang Siyiex, an mawh pa kied singax singeh. ²⁶ Cao giex kaing li khankix pa tan ka son phimap, tak ih an ka dee pa singax singeh, pa koe ka daux nyiex gox buan man bang kum pui hun. ²⁷ Can pui pa teeh ka nex an tak singax singeh mai kraung ceep pa caw nham tix phreeh kah, tak deeh sidaux ka dahdee pa singax singeh. ²⁸ Aw tiex pa hoik ngaik kix nex ka daux, tak pah max mai phan kix ngaik nex ka daux aw tawng lheung, tak caw ti thui mai sigrah singax ka rawm. ²⁹ Can simex daux cao giex kaing li khankix tak ih ka nex an, an mawh pa kied singax singeh. ³⁰ Viang mawh nan, krax tan son pa pluatploi phimap pa viex kix nham laig ka daux nyiex gox buan man bang kum, son pa sang yuh krax khioxkhaw ka dee pa singax singeh, tak ang pon ti ih ka nex an, tak gleeing an ka ngu heue.

7 Been Krax Tan Pa Pluatploi

⁷ Grawng been son krax tan pa pluatploi krax lud mawh pa kied singax singeh. Kadee pah kix totan pa gleeing tak pah krax tan

pa pluatploi krax lud, tak phruah nham hawt rawb vungviang piang khu dee tan khawmuik. ³ Nawh tak tan khlawp bee an khawmuik tau mai bee pa koe plak sidax, bee pa kheem piang kraung vaig ⁴ mai soklax ra mu, bee pa koe ka plak daux nyoi, khlawp bee pa kawb tawm piang soklax khankix nawh tak teei lih ⁵ mai cao giex kaing li tak gleeing an piang khu dee tan awm krax tan pa gleeing ka ngu son Siyiex, an mawh krax tan pa pluatploi krax lud. ⁶ Can simex daux cao giex kaing li khankix tak yaox ti ih an mai caw ti ih dee pa singax singeh, an mawh pa kied singax singeh. ⁷ Krax tan son pa pluatploi krax lud mawh pa awm krax tan pa pluatploi phimap, been an mawh ngie tix mu khaing, cao giex kaing li pa yuh ti tawx krax khioxkhaw ka son an khankix tak pon ti cie an. ⁸ Cao giex kaing li pa yuh krax tan pa gleeing son pui tix kaux kaux mai cao giex kaing li an tak yaox ti cie hak totan pa gleeing pa hoik tan nawh. ⁹ Krax tan ceu pa ih kuceu pa hoik ping sin ka daux glah ngu mai can pa hoik khrierien nawh ka daux aw khang phan ang mawh nan, ka daux diang rhiem tak mawh cie cao giex kaing li pa yuh krax tan ka son an. ¹⁰ Can krax tan ceu pa ih, pa hoik kluklao tix ka bee angah, pa kroh angah tak mawh cie kawn simex Arun khankix, kieh kix goih sidu awm paox tix heue.

Been Krax Tan Pa Nhim

¹¹ “In mawh grawng been son krax tan pa appong krax tan pa nhim pa tak sang tan ti ka Simiang Siyiex. ¹² Phan nawh yuh krax tan son pa yaogyaw, khaix an nawh tak yuh krax tan an tau mai krax tan pa yaogyaw ka blah rhi khlawp pa kluklao ka bee pa ang sau susaix, blah rhi khlawp pa yuh ka phawng nghox ca im, pa hoik kluklao tix mai bee pa hoik diag sin. ¹³ Lheu khaing blah rhi khlawp an nawh tak yuh blah pa sau susaix tau mai son krax tan pa yaogyaw ka krax tan pa nhim. ¹⁴ Khaing ka daux krax tan blah rhi khlawp kuceu, nawh tak teei tix ceu tix khlawp pa yaog son Siyiex, an tak mawh cie cao giex

kaing li pa phruah nham krax tan pa nhim. ¹⁵ Nex pa yuh nawh krax tan pa yaogyaw son krax pa nhim, tak ih nex an ka daux singaix pa yuh nawh krax tan, nawh tak ang pon ti deuh an tom hoek plak pongawb. ¹⁶ Viang mawh nan, phan mawh krax tan pa hoik yuh nawh sijax mukheu angah mai krax tan pa kaoh khaing rhawm nawh angah, tak yaox ti ih ka daux singaix pa yuh ti krax tan mai pa kawn deuk tak pon ti ih tom hoek singaix khaix, ¹⁷ nex pa kawn deuk khaing krax tan khankix, yam hoek loe ngaix tix ngaix, tak caw ti gleeing ka ngu, ¹⁸ Yam hoek loe ngaix tix ngaix, phan ih ka nex krax tan pa nhim an ceeix ngie khaing, Siyiex ang khawrhawm ka cao pa tan an, tak mawh pa seeing brai mai pui pa ih ka an khankix tak yaox ti kham phimap. ¹⁹ Nex pa hoik teeh ka ceu pa seeing brai tix ceuceu, tak ang pon ti ih, an tak caw ti gleeing ka ngu. Can pui pa singax kukaux tak pon ti ih ka nex pa singax an. ²⁰ Phan pui tix kaux kaux ih ka nex krax tan pa nhim pa appong ka Simiang Siyiex, yam ang tokaux tix singax, tak teei ti tik pui an khaing ceu pui nawh. ²¹ Phan pui tix kaux kaux hu teeh ka pa seeing brai, pa seeing khaing kawn pui ang ah, khaing tobrie angah, can viag pa seeing pa ang singax tix ceuceu mai ih ka nex krax tan pa nhim pa appong ka Siyiex, tak teei ti tik pui an khaing ceu pui nawh heue.”

Ang Pon Ti Ih Ka Bee Mai Nham

²² Khaix an Simiang Siyiex ah nin ka Mose, ²³ “Krai ka pui Isarela khankix, pex tak ang pon ti ih khlawp bee mawie, yung mai khlawp bee pex, ²⁴ khlawp bee tobrie pa tang yum mai bee tobrie pa hoik kiied tobrie he khankix, viang chix shiao son tang ceu kawx, pex ang pon ti ih kah. ²⁵ Pui pa ih ka khlawp bee tobrie pa hoik gleeing ka ngu, Siyiex tak teei ti tik pui an khaing ceu pui nawh. ²⁶ Lheu khaing an, pex tak ang pon ti ih nham tix ceu kawx, ka can dee ot tix, pa mawh nham sim angah mai nham tobrie angah, ²⁷ can pui pa ih nham tix ceuceu tak teei ti tik pui an khaing ceu pui nawh.

7:26-27 Yam 9:4, Krub 17:10-14, 19:26, Pi 12:16, 23, 15:23.

Yung Cie Arun Mai Kawn Simex Nawh

²⁸Khaix an, Simiang Siyiex ah nin ka Mose, ²⁹“Krai ka pui Isarela khankix, pui pa yuh krax tan pa nhim pa appong ka Siyiex, nawh tak viex krax tan ti hoek ka Siyiex khaing krax tan pa nhim, ³⁰tokaux nawh tak yaox ti viex krax tan pa gleeing ka ngu son Siyiex, nawh tak viex khlawp bee tau mai nex eek, son nex eek pa mawh krax tan yangyeuh mai yangyeuh sivoe Simiang Siyiex. ³¹Cao giex kaing li tak gleeing khlawp bee piang khu dee tan mai nex eek an tak mawh cie Arun mai kawn simex nawh khankix. ³²Maix tak tawx ba khawn dawm ka cao giex kaing li, son krax tan pa yaog khaing krax tan pa nhim pa appong tix. ³³Ka daux kawn simex Arun khankix, pa tan nham mai khlawp bee son krax tan pa nhim, ba khawn dawm tak mawh nyum cie nawh. ³⁴Mawh kheu nex eek krax tan pa yangyeuh an mai ba krax tan pa yaog Aux hoik teei khaing pui Isarela khankix mai khaing pa appong kix krax tan pa nhim, Aux hoik tawx ka cao giex kaing li Arun mai kawn simex nawh khankix, Aux hoik deuh mawh pingnyap leeingju ka daux ceu pui Isarela. ³⁵In mawh yung pa pon Arun mai kawn simex nawh khankix khaing krax tan pa gleeing ka ngu son Siyiex, ka daux singaix pa hoik ap kix yuh kaing jhaw cao giex kaing li cie Siyiex. ³⁶Siyiex hoik tawx lox ka pui Isarela khankix mai ap ceu in ka kix, jah ka singaix pa hoik kham kix ti rieb pa groi rawm bee, an hoik mawh pingnyap leeingju ka daux doeh ru kix tix ju hoik tix ju.” ³⁷In mawh grawng been krax tan pa gleeing, krax tan ceu pa ih, krax tan pa pluatploi phimap, krax tan pa pluatploi krax lud, krax tan pa nhim, pa appong tix yam yuh kaing jhaw pa singax singeh. ³⁸Yam hoik tawm Simiang Siyiex lox ka Mose piang gawng Sina, daux singaix pa tawm Nawh Cao lox sonsang viex pui Isarela khankix krax tan ka Siyiex ka daux tiag Sina heue.

Arun Mai Kawn Simex Nawh

(Lih 29:1-37)

8 Simiang Siyiex ah nin ka Mose, ²“Viex Arun mai kawn simex nawh khankix tau mai kraung ceep, bee pasang groi, mawie

mhaing son krax tan pa pluatploi, kawn yung mhaing ra mu mai blah pa ang sau susaix tix khrawng, ³krawk khrawm cub pui hun ka diang siviex nyiex gox buan man bang kum.” ⁴Mose yuh awm lox pa tawm Simiang Siyiex ka nawh mai cub pui hun khankix khrawm paox tix ka diang siviex nyiex gox buan man bang kum. ⁵Mose ah nin ka cub pui hun, “In mawh lox pa hoik tawm Simiang Siyiex sonsang hawt yuh.” ⁶Mose viex Arun mai kawn simex nawh khankix mai heem kix ka rawm. ⁷Nawh ceep ti tawx sibex dhah plak daux ka Arun mai nhawt maox rawd nyoi mai ceep sibex dhah plak piang mai deeh ceep sibex dhah dawd taix piang nawh mai nhawt ka man pa taing ka keei kuceu, pa koe piang sibex dhah dawd taix mai nhawt piang an. ⁸Sau man tie naok piang naok nawh mai deeh sau Urim mai Tumim ka daux man tie naok an. ⁹Ceep lawk kaing ka kaing Arun mai kawb khlawp khri ka sivoe ngai man lawk kaing pa mawh mhok khri awm pa hoik tawm Simiang Siyiex ka Mose. ¹⁰Mose teei bee groi mai groi ka nyiex gox buan man mai can pa koe daux nyiex mai yuh an khankix singax singeh, ¹¹Nawh phruah bee piang khu dee tan aliah bawg mai groi ka khu dee tan mai can kraung pa shiao ka pan khoeik mai khawm ka caong nawh sonsang mawh pa singax singeh. ¹²Nawh groi bee piang kaing Arun sonsang singax singeh. ¹³Mose deeh kok ka kawn simex Arun khankix mai ceep sibex dhah plak daux piang kix mai nhawt maox rawd nyoi ka kix mai ba ox dee ceep mhok piang kix awm gumlox pa hoik tawm Simiang Siyiex ka Mose. ¹⁴Nawh tok mawie mhaing son krax tan pa pluatploi phimap, Arun mai kawn simex nawh khankix deuh taix tix piang kaing mawie mhaing an son krax tan pa pluatploi phimap. ¹⁵Mose pah ka mawie an mai teei nham ka giien taix tix mai sau piang rung khu dee tan hawt rawb vungviang khawmuik mai kieh khu dee tan singax kah, nawh hieh nham pa kawn deuk ka caong khu dee tan kieh mawh pa singax singeh sonsang yuh krax pa pluatploi. ¹⁶Nawh teei khlawp bee pa koe piang kraung vaig mai bee pa kawb tawm mai pa kawb soklax ra

mu mai Mose gleeing an khankix piang khu dee tan. ¹⁷ Nawh tak gleeing mawie an khawm hak, nex mai roing ka ngu ka plak praix nyiex bang awm gumlox pa hoik tawm Simiang Siyiex ka Mose. ¹⁸ Nawh deeh viex kawn yung mhaing son krax tan pa gleeing, Arun mai kawn simex nawh khankix deuh taix tix piang kaing kawn yung an. ¹⁹ Mose pah totan an mai phruah nham piang khu hawt rawb vungviang khu dee tan, ²⁰ Nawh tat nex kawn yung khik mawx khik an mai Mose gleeing kaing mai khik nex mai khlawp bee khankix, ²¹ sigrah kraung vaig mai caong ka rawm, Mose gleeing kawn yung khawm mu piang khu dee tan, mawh krax tan pa gleeing pa sioe bhawng mai krax tan pa gleeing ka ngu son Siyiex awm gumlox pa hoik tawm Simiang Siyiex ka Mose. ²² Nawh baoh deeh viex kawn yung mhaing tix mu pa hoik laug sonsang tawx ara ka Arun mai kawn simex nawh khankix deuh taix tix piang kaing kawn yung an. ²³ Mose pah totan an mai teei nham tixblauh sau ka dawng yaok plak dawm Arun mai piang giien ting taix khawn dawm mai piang giien ting caong khawn dawm. ²⁴ Khaix an nawh kok kawn simex Arun khankix, Mose sau nham tixblauh piang giien ting taix khawn dawm kix mai piang dawng yaok khawn dawm kix mai piang giien ting caong khawn dawm mai Mose phruah nham hawt rawb vungviang piang khu dee tan. ²⁵ Nawh teei khlawp bee mai sidax, khlawp bee pa koe piang kraung vaig hawmuik mai khlawp bee pa kawb tawm mai bee pa kawb soklax ra mu mai bee khankix mai ba khawn dawm, ²⁶ Nawh teei blah tix lon pa ang sau susaix khaing kraung pa deuk sioe Simiang Siyiex, nawh teei blah pa ang sau susaix pa mawh blah pa hoik yuh ka bee mai blah rhi khlawp tix khlawp, nawh deuh piang khlawp bee mai piang ba khawn dawm, ²⁷ Nawh sau an khankix ka daux tawm taix Arun mai kawn simex nawh khankix, yangyeuh an khankix ka plak sioe Simiang Siyiex mai yuh krax tan pa yangyeuh. ²⁸ Mose teei an khaing daux tawm taix kix mai gleeing piang khu dee tan krax tan pa gleeing, an mawh krax tan pa sioe

bhawng pa tawx ara, mawh krax tan pa gleeing ka ngu son Siyiex. ²⁹ Mose teei nex eek mai yangyeuh sioe Simiang Siyiex, mai yuh krax tan pa yangyeuh, nex eek kawn yung pa tawx ara an mawh nyum cie Mose, awm gumlox pa hoik tawm Simiang Siyiex ka Mose. ³⁰ Mose teei bee groi tixblauh mai nham tixblauh, pa koe piang khu dee tan mai phruah piang Arun mai kraung ceep nawh mai piang kawn simex mai kraung ceep kix, nawh kieh Arun mai kraung ceep nawh mai kawn simex nawh khankix singax singeh tau mai nawh. ³¹ Mose ah nin ka Arun mai kawn simex nawh khankix, "Ngaik nex hawt diang siviex nyiex gox buan man bang kum, ih tan tau mai blah pa koe daux khrawng pa tan son pa tawx ara, awm gumlox pa hoik tawm aux ah nin, Arun mai kawn simex nawh khankix tak ih an, ³² Maix tak gleeing can nex pa kawn deuk mai blah ka ngu. ³³ Maix tak ang pon ti lih ka praix diang siviex nyiex gox buan man bang kum been aliah ngaix, tom ang singaix bawgyam tawx ara ka maix nyang sidah, mawh kheu bawg yam tawx ara ka maix rheeng aliah ngaix. ³⁴ Awm pa hoik yuh ka daux in singaix, Siyiex hoik tawm lox sonsang yuh krax pa pluatploi son pex. ³⁵ Maix tak ot ka diang siviex nyiex gox buan man bang kum aliah ngaix, aliah sawm mai yuh kaing jhaw pa tawx Siyiex son ang maix sang yum awm gumlox pa hoik tawm ka aux yuh nin." ³⁶ Mawh kheu nan, Arun mai kawn simex nawh khankix, yuh ceu an awm gumlox pa hoik tawm Simiang Siyiex ka Mose heue.

9 Kaing Jhaw Cao Giex Kaing Li

Yam hoek daux daix ngaix, Mose kok ka Arun mai kawn simex nawh khankix mai kuad song ceu pui Isarela, ² nawh ah nin ka Arun, "Teei kawn mawie iak tix mu son krax tan pa pluatploi phimap mai kawn yung tix mu son krax tan pa gleeing, pa loig khawm ra mu mai tan an ka sioe Simiang Siyiex. ³ Krai ka ceu pui Isarela ah nin, teei kawn pex mhaing iak tix mu son krax tan pa pluatploi phimap, kawn mawie iak tix mu mai kawn yung iak tix mu pa hoik naog num pa loig khawm ra mu son krax tan pa gleeing. ⁴ Teei mawie mhaing tix mu mai kawn yung mhaing tix mu son krax

tan pa nhim, son pa sang appong tix sivoie Simiang Siyiex mai krax tan ceu pa ih pa hoik klao tau mai bee, Siyiex tak lih bleeh ka pex ka daux in singaix.”⁵ Kix viex can pa hoik tawm Mose sivoie nyiex gox buan man bang kum mai cub pui hun greed dex mai cung sivoie Simiang Siyiex.⁶ Mose ah nin, “In mawh pa hoik tawm Simiang Siyiex pex yuh mai min plakngai Siyiex taklih bleeh ka pex.”⁷ Mose ah nin ka Arun, “Hu ka khu dee tan mai tan krax tan son pa pluatploi phimap mai khawm krax tan pa gleeing mai yuh krax khioxkhaw pa pluatploi phimap son tokaux maix mai son pui khankix, tan krax tan pa viex pui hoek mai yuh krax khioxkhaw son kix, awm gumlox pa hoik tawm Simiang Siyiex.”⁸ Arun hu ka khu dee tan mai pah kawn mawie iak son krax tan pa pluatploi phimap ka son tokaux tix.⁹ Kawn simex Arun khankix viex nham hoek ka nawh, nawh cub giien taix tix ka daux nham mai sau piang rung khu dee tan mai hieh nham pa kawn deuk an hawt caong khu dee tan,¹⁰ nawh gleeing khlawp bee, soklax mai ngheu khlawp bee tawm son krax tan pa pluatploi phimap piang khu dee tan awm gumlox pa hoik tawm Simiang Siyiex ka Mose.¹¹ Nawh gleeing nex mai hak tau ka daux ngu plak praix nyiex bang.¹² Nawh pah ka totan pa gleeing mai kawn simex Arun khankix viex nham hoek plak sivoie nawh mai nawh phruah nham an khankix hawt rawb vungviang piang khu dee tan.¹³ Kix deeh viex krax tan pa gleeing hoek ka plak sivoie nawh khawm khik nex mai kaing, nawh gleeing an khankix piang khu dee tan.¹⁴ Nawh sigrah kraung vaig mai caong, nawh gleeing an khankix tau mai krax tan pa gleeing piang khu dee tan.¹⁵ Nawh viex krax tan pui khankix hoek mai teei kawn pex son krax tan pa pluatploi phimap son pui khankix mai pah ti tan son phimap awm pa hoik tan kix phaoka tix mu.¹⁶ Nawh baoux viex krax tan pa gleeing hoek mai tan awm pa hoik koe been.¹⁷ Nawh baoux viex krax tan ceu pa ih mai teei ka taix tix, tix jhawp mai gleeing an piang khu dee tan, sivoie dee

gleeing kix krax tan plak ponngawb.¹⁸ Nawh baoux pah mawie mhaing mai kawn yung iak pa ap kix son krax tan pa nhim son pui khankix, kawn simex Arun khankix viex nham hoek, nawh phruah nham an vung viang piang khu dee tan khawmuik.¹⁹ Khlawp bee mawie mhaing mai kawn yung khawm khlawp bee sidax mai khlawp bee pa kawb kraung vaig, soklax mai tawm,²⁰ kix deuh khlawp bee an khankix piang nex eek, nawh gleeing khlawp bee an khankix piang khu dee tan²¹ mai Arun yangyeuh nex eek mai ba khawn dawm, son krax tan pa yangyeuh sivoie Simiang Siyiex awm lox pa hoik tawm Mose.²² Arun yaog taix tix ka plak pui hun mai nawb buan piang kix mai lih khaing ka dee krax tan son pa pluatploi phimap mai krax tan pa gleeing khawm krax tan pa nhim khankix.²³ Mose mai Arun laig daux nyiex gox buan man bang kum pui hun mai deeh lih plak praix mai nawb buan piang pui khankix. Khaix an, min plakngai Siyiex plak jhi tix ka pui khawmuik,²⁴ Siyiex ploi ngu lih mai gleeing ka krax tan pa gleeing mai khlawp bee pa koe piang khu dee tan yam yaoux pui khankix ka an, kix kok yo mai gup ngai tix piang tiex khawmuik heue.

Phimap Nadat Mai Abihux

10 Kawn simex Arun pa mawh Nadat mai Abihux viex pan ngu hoek tix kaux tix mu mai sau ngu ka mai baoux sau pa sioe bhawng piang an mai kiex yuh krax gleeing, ngu pa tang siyox, ka sivoie Simiang Siyiex, pa mawh ngu pa ang Siyiex nyang tawm ka kiex.² Ngu lih khaing sivoie ngai Siyiex mai gleeing kiex khawm ra mai kiex yum plak sivoie Simiang Siyiex.³ Mose ah nin ka Arun, “Siyiex hoik krai ah nin, Aux tak mawh pa singax singeh sinax ceu pui pa dex mai Aux mai sivoie pui hun khankix, Aux tak mawh pa koe min plakngai.” Arun ot yiienyawg tix.⁴ Mose kok ka Mishelax mai Elazapha kawn simex Awzalax, pa mawh keeing iak Arun, nawh ah nin ka kiex, “Hoek dee dex mai klawm puxaik maix lih khaing sivoie dee pa singax singeh ka plak praix nyiex bang.”⁵ Kix hoek dex mai klawm kiex hu khawm sibex dhah ceep kiex ka plak praix nyiex bang awm gumlox pa hoik krai Mose.⁶ Mose ah nin ka

Arun mai kawn simex nawh Eliaza mai Itama, "Pex paw peeik mhok mai paw ploihauk kaing tix yih mai paw riah ka kraung ceep tix, aux lhat pex yum mai lhat krax songrhawm Siyiex hoek piang pui khawmuik, viang mawh nan, kieh puxaik pex mai kawn nyiexma pui Isarela khawmuik riagyo mai khirhawm ka ngu pa hoik yuh Siyiex. ⁷ Pex tak ang pon ti lih khaing dauh siviex nyiex gox buan man bang kum pui hun kheu lhat aux pex yum, grawh grawng nawh bee groi pa hoik appong Siyiex koe piang pex. Kix yuh awm lox pa kraimose heue.

Pa Caw Cao Giex Kaing Li Ti Yuh

⁸ Siyiex ah nin ka Arun, ⁹ "Maix khawm kawn simex maix khankix, yam laig pex ka dauh nyiex gox buan man bang kum pui hun, paw nyaux rawm plix siiet mai plai, kheu lhat Aux pex yum, an tak mawh gumlox been pa caw pex ti hawt khawm doeh ru pex leeingju, ¹⁰ sonsang chix goih pex pa singax singeh khaing pa ang singax singeh mai pa singax khaing pa ang singax, ¹¹ mai sonsang chix gau pex ceu pui Isarela khankix ka gumlox beenli pa hoik sikah Siyiex ka kix khawmuik ka Mose." ¹² Mose kraimose ah nin ka Arun mai kawn simex nawh pa kawn deuk pa mawh Eliaza mai Itama, "Teei krax tan ceu pa ih pa kawn deuk khaing krax tan pa gleeing ka ngu son Siyiex mai ih an kix tau mai pa ang sau susaix hawt rawb vungviang khu dee tan, mawh kheu an mawh pa kied singax singeh. ¹³ "Pex tak ih an khankix ka dee pa singax singeh, kheu hoik mawh an son maix, khawm kawn simex maix khankix, pa mawh krax tan pa gleeing ka ngu son Siyiex. In mawh gumlox beenli pa hoik tawm Siyiex ka aux." ¹⁴ Eek krax tan pa yangyeuh mai klip krax tan pa yaog maix caw ti ih dee pa singax tau mai kawn simex kawn sibun tix. Mawh kheu an mawh son maix mai son kawn simex maix, pa pon kix khaing pa appong tix son krax tan pa nhim, pa kaoh khaing pui Isarela. ¹⁵ Kix tak viex ba krax tan pa yaog mai euk krax tan pa yangyeuh hoek tau mai khlawp bee krax tan pa gleeing ka ngu, sonsang mawh krax tan

pa yangyeuh sivo Simiang Siyiex mai an tak mawh cie maix, khawm cie kawn simex maix khankix, in mawh son pa caw pex ti pon leeingju, awm gumlox pa hoik tawm Simiang Siyiex. ¹⁶ Khaix an, Mose coca ti sawg ka pex mhaing son krax tan pa pluatploi phimap mai nawh yaog ka hoik gleeing kix tan, nawh songrhawm ka kawn simex Arun pa deuk ankiex pa mawh Eliaza mai Itama mai nawh ah nin, ¹⁷ "Pex lai ang ih krax tan son pa pluatploi phimap ka dee pa singax singeh yuh ka mawx? Awm hoik mawh ankiex pa kied singax singeh, pa tawx Siyiex ka pex, sonsang klawm pex phimap cub pui hun khankix mai sonsang yuh pex krax khioxhaw mai krax pluatploi phimap son kix sivo Simiang Siyiex. ¹⁸ Jhak heue, pex ang nyang viex nham laig ka dauh dee pa singax singeh, pex khaw ti ih nex tan an ka dauh dee pa singax singeh, awm gumlox pa hoik tawm aux." ¹⁹ Arun deeh ah nin ka Mose, "Kix hoik tan krax tan pa pluatploi phimap tix dauh in singaix mai krax tan pa gleeing ka sivo Simiang Siyiex mai grawng ceu inkix hoik klup piang aux, phan aux hoik pon ti ih ka krax tan pa pluatploi phimap an dauh in singaix, khex mawh pa khawcaw ka sivo ngai Siyiex lie?" ²⁰ Yam mhong Mose lox an, nawh koe krax fahrhawm kah heue.

11 *Tobrie Pa Chix Ti Ih* (Pi 14:3-21)

Simiang Siyiex ah nin ka Mose mai Arun, ² "Kraimose ceu pui Isarela khankix ah nin, inkix mawh ceu tobrie pa caw pex ti ih khaing tobrie khankix pa koe piang haktiex, ³ can tobrie pa koe gip, pa jiah gip mai tobrie pa deeh sai roing ti khankix, pex tak pon ti ih. ⁴ Viang mawh nan pex tak ang pon ti ih tobrie pa deeh sai roing tix, tobrie pa jiah gip pa mawh kala-uk, mawh kheu tobrie pa deeh sai roing tix pa ang jiah gip, mawh pa ang singax ka son pex, ⁵ ghot pa deeh sai roing tix, kheu ang gip caong kix jiah mawh pa ang singax ka son pex ⁶ mai piet la pa deeh sai roing tix kheu ang jiah gip, mawh pa ang singax ka son pex, ⁷ lig khankix viang jiah gip kawx, nawh ang deeh sai roing tix, mawh pa ang singax son pex. ⁸ Nex tobrie ceu in khankix pex tak ang pon ti ih mai ang pon ti hu teeh

ka tokaux yum an, kix mawh pa ang singax son pex. ⁹ Inkix mawh pa pon pex ti ih khawmuik khaing tobrie pa koe dauw rawm, pa koe pruiik, pa koe sibiak, can pa koe dauw rawm sigrit sigra angah, dauw rawm klawng khankix angah pex tak pon ti ih. ¹⁰ Viang mawh nan, pa koe dauw rawm sigrit sigra mai pa koe dauw rawm klawng, pa ang koe pruiik mai sibiak, pa im ju chix hu dauw rawm, khawm canceu pa im ju dauw rawm khawmuik, mawh pa seeing son pex. ¹¹ Ankix, mawh pa seeing son pex mai pex tak ang pon ti ih nex ankix, viang mawh ka to yum, an kawx mawh pa seeing son pex. ¹² Canceu pa koe dauw rawm, pa ang koe pruiik mai sibiak, tak mawh pa seeing son pex, ¹³ inkix tak mawh pa seeing, khaing dauw ceu sim sai pa ang pex pon ti ih, pa mawh klang ting, klang preng, klang krih, ¹⁴ klang teei ia mai klang te mai ¹⁵ canceu lak khankix pa koe ceu mawx ceu an, ¹⁶ sim kala-uk, klang sawm, sivik rawm mai ceu klang khankix, ¹⁷ plangplawh, sim tareei, klang pet, ¹⁸ klang lai, sim ploh ble mai lak tiag, ¹⁹ klang lang gaoh, sim saoh, gawx cux, blak mai ceu pa awm an khankix. ²⁰ Canceu viag pa koe pruiik pa chix mu ka caong pon khawn khawmuik, tak mawh pa seeing son pex. ²¹ Viang mawh nan, inkix tak mawh pa pon pex ti ih khaing canceu viag pa koe pruiik pa chix mu ka caong pon khawn, pa koe caong pa koe ba khankix, sonsang pon phoh kix ti piang tiex. ²² Pex tak pon ti ih sido nghox mai paox ceu nawh khankix, sido khaox glawm mai paox ceu nawh, awk tawng mai paox ceu nawh, sigra mai paox ceu nawh. ²³ Viang mawh nan canceu viag pa koe pruiik tang ceu, pa koe caong pon khawn tak mawh pa seeing son pex heue.

Tobrie Pa Ang Singax Khankix

²⁴ "Inkix mawh pa kieh maix ang singax ka, can pui pa hu teeh ka to yum ankix, tak mawh pa ang singax tom hoek plak bo. ²⁵ Can pui pa viex to yum inkix mai tix, tak sidaux kraung tix mai nawh mawh pa ang singax tom hoek plak bo. ²⁶ Can tobrie pa jiah gip, pa ang jiah gip angah, pa ang deeh sai roing tix, ceu an khankix mawh pa seeing son pex,

can pui pa hu teeh ka to yum an kukaux, tak mawh pa seeing kah. ²⁷ Can tobrie pa hu ka caong tix khaing dauw sinax tobrie khawmuik, pa koe caong pon khawn, mawh pa ang singax ka son pex, can pui pa hu teeh ka to yum an, tak mawh pa ang singax tom hoek plak bo. ²⁸ Can pui pa viex to yum ankix mai tix, tak yaox ti sidaux kraung tix mai nawh mawh pa ang singax tom hoek plak bo, ankix mawh pa ang singax son pex. ²⁹ "Ceu inkix kawx mawh pa ang singax son maix, khaing ceu pa chix mu mai pa mu ti hu piang tiex, pa mawh beei, kiang mai goe khawm paox ceu nawh, ³⁰ goe tawk kie, lai tang, lai lee, goe rang, goe rham. ³¹ Ankix mawh pa ang singax son pex khaing sinax ceu pa chix mu chix hu, can pui pa hu teeh ka ceu pa hoik yum an khankix tak mawh pa ang singax tom hoek plak bo. ³² Phan to yum an cod piang kraung ceu patix angah, an tak mawh pa ang singax kah, phan rau piang khaox pa shiao angah, piang kraung ceep angah, piang hak angah, piang chee khankix angah, ceu pa yuh ka mawx kawx, tak mawh pa ang singax, kraung an khankix tak yaox ti ce dauw rawm mai an khankix tak mawh pa ang singax tom hoek plak bo, khaix an kraung khankix tak deeh singax. ³³ Phan to yum an cod ka dauw aw tiex, maix tak pah aw an max. Canceu pa koe ka dauw aw an khankix tak mawh pa ang singax, ³⁴ phan to yum an cod ka dauw aw pa koe pa ih mai dauw rawm nyaux, ceu an tak lih ti mawh pa ang singax mai rawm nyaux an tak mawh pa ang singax son maix. ³⁵ Ceu pa hoik cod to yum an khankix ceex ceex kawx tak mawh pa ang singax, viang mawh ka tao ngu mai kiang ngu kawx caw ti yieh laux, an khankix tak mawh pa ang singax ka son pex. ³⁶ Viang mawh nan, dee lih rawm klawng khankix angah, rawm dauw pa kaong pex angah, tak mawh pa singax, can pui pa hu teeh ka to yum an khankix ngie, tak lih ti mawh pa ang singax kah. ³⁷ Phan to yum an cod piang simie pa sang sum pex ceex khaing, simie an kawn mawh pa singax. ³⁸ Viang mawh nan, phan to yum cod piang simie pa hoik ce

hoik dum pex, an tak lih ti mawh pa ang singax son pex.³⁹ Phan tobrie pa chix ih pex khankix yum, pui pa hu krox hu teeh ka to yum an, tak mawh pa ang singax tom hoek plak bo.⁴⁰ Pui pa ih nex to yum an, tak yaox ti sidaux kraung ceep tix mai nawh tak mawh pa ang singax tom hoek plak bo. Pui pa viex to yum an hu kawx, tak yaox ti sidaux kraung ceep tix mai nawh tak mawh pa ang singax tom hoek plak bo.⁴¹ Canceu pa chix mu ti hu piang tiex khankix mawh pa seeing, pex tak ang pon ti ih kah.⁴² Canceu pa mu ti hu ka vaig tix mai canceu pa hu ka caong pon khawn angah, canceu pa koe caong haohhun khaing ceu pa mu ti hu, pa chix mu ti hu piang tiex, ceu inkix pex tak ang pon ti ih, mawh kheu ankix mawh ceu pa seeing.⁴³ Pex tak ang pon ti yuh krax pa seeing ka tokaux tix, ka ceu pa chix mu chix hu tix ceu kawx, pex tak ang pon ti yuh tokaux tix seeing ka ceu ankix, Aux lhat pex seeing brai ka jao an.⁴⁴ Aux mawh Simiang Siyiex pa mawh Simiang Siyiex pex. Mawh kheu nan, pex tak mawh pa singax, grawh grawng nawh Aux mawh pa singax, pex tak ang pon ti seeing brai ka jao ceu pa chix mu ti hu tix ceu kawx mai ka pa mu ti hu piang tiex khankix.⁴⁵ Aux mawh Simiang Siyiex pa hoik viex pex lih hu khaing daux haktiex Ejiptux sonsang mawh Aux Simiang Siyiex pex. Mawh kheu nan, pex tak mawh pa singax, mawh kheu mawh Aux pa singax singeh.⁴⁶ In mawh grawng been son tobrie mai sim sai khankix mai canceu pa im ju pa koe daux rawm kuceu mai ceu pa chix mu ti hu piang tiex.⁴⁷ Sonsang goih Aux ti deuh pa ang singax khaing sinax ceu pa singax mai sinax ceu pa pon pex ti ih mai ceu pa ang pex pon ti ih khankix heue.

12 *Grawng Been Khaix Keh*

Simiang Siyiex ah nin ka Mose.² "Krai ka ceu pui Isarela khankix ah nin, phan bun nghe mai keh kawn simex, nawh tak mawh pa ang singax aliah ngaix awm yam hoek mee bun nawh tak mawh pa ang singax.³ Yam hoek daix ngaix, tak yaox ti pat hak

kawn simex an.⁴ Khaix an, nawh tak baox yaox ti ot tixngoe loe ngaix glang deeh singax nham nawh, nawh tak ang pon ti hu krox hu teeh ka ceu pa singax tix ceu kawx. Nawh tak ang pon ti laig ka daux dee pa singax singeh, glang ang nawh nyang deeh naog singaix pa singax.⁵ Phan nawh keh kawn sibun, nawh tak mawh pa ang singax ra vang tuah, awm yam ang mee bun nawh nyang singax mai nawh tak baox deeh yaox ti ot tixgliah liah ngaix glang sang deeh nham nawh.⁶ Yam hoik deeh naog singaix singax nawh, son kawn simex nawh angah, son kawn sibun nawh angah, nawh tak viex kawn yung pa taug naog num hoek tix mu ka cao giex kaing li, son krax tan pa gleeing mai kawn sikaux tix mu angah, keukie tix mu angah, son krax tan pa pluatploi phimap, ka diang siviex nyiex gox buan man bang kum.⁷ Cao giex kaing li tak tan ankix sivoex Simiang Siyiex mai yuh krax khioxkhaw pluatploi phimap son nawh mai nawh tak singax khaing pa lih nham tix. In mawh grawng been son bun, pa hoik keh kawn simex, kawn sibun angah.⁸ Phan nawh ang pon tan kawn yung tix mu, khaix an nawh tak yaox ti viex sikaux ra mu, phan ang mawh nan, keukie ra mu hoek son krax tan pa gleeing tix mu mai son krax tan pa pluatploi phimap tix mu. Mawh kheu nan, cao giex kaing li tak yuh krax khioxkhaw pluatploi phimap son kiex mai kiex tak mawh pa singax heue."

13 *Grawng Been Saux Sipawg*

Simiang Siyiex ah nin ka Mose mai Arun.² Phan pui tix kaux koe saux uah angah, saux dao angah, saux muad piang hak nawh angah mai yam koe krax saux an piang hak tokaux nawh awm pa saux sipawg, kieh kix viex nawh hoek ka cao giex kaing li Arun, phan ang mawh nan, kieh hoek ka kawn simex nawh tix kaux kaux pa mawh cao giex kaing li.³ Cao giex kaing li tak jhak jhawm saux pa koe piang hak nex nawh, phan hauk pa koe piang dee saux nawh paing mai jhawm saux an raux khaing hak nex nawh, an mawh jhawm saux sipawg, khaix an cao giex kaing li tak jhak ka nawh mai tat nawh mawh pa ang singax.⁴ Phan dee saux an mawh pa paing

11:44 Krub 19:2. 1Pet 1:16. 12:3 Yam 17:12. 12:8 Luk 2:24.

piang hak tokaux nawh mai ang raux khaing hak nawh mai hauk nawh kawx ang paing, khaix an cao giex kaing li tak gang pui saux an ot nongnong been aliah singaix. ⁵ Cao giex kaing li tak jhak ciied ka nawh, yam hoik naog daux aliah singaix mai phan jhawm saux an ang nyang tah piang hak nawh, cao giex kaing li tak baox deeh gang tix jhak ciied nawh aliah ngaix. ⁶ Khaix an cao giex kaing li tak deeh baox jhak ciied nawh, yam hoik hoek aliah singaix, phan jhawm saux an hoik lung mai ang nyang tah piang hak nawh, khaix an cao giex kaing li tak krai pao nawh mawh pa singax, in mawh ngie jhawm saux dao mai nawh mawh pa singax khaix hoik sidaux nawh kraung ceep tix. ⁷ Viang mawh nan, phan jhawm saux dao nawh hoik pon ti tah piang hak nawh, khaix hoik jhak ciied cao giex kaing li ka pa hoik singax nawh, nawh baox deeh kieh cao giex kaing li jhak ciied jhawm saux tix. ⁸ Phan cao giex kaing li hoik yaox tah saux dao an piang hak nawh tete, khaix an nawh tak krai pao mawh pa ang singax, an mawh jhawm saux sipawg. ⁹ Pui mawx tix kaux kaux pa hoik koe jhawm saux sipawg, khaix an kix tak viex nawh hoek ka cao giex kaing li. ¹⁰ Cao giex kaing li tak jhak ciied ka nawh mai jhawm saux muad an hoik paing piang hak nawh tete mai kieh hauk nawh lih ti paing mai nex nawh lih ti raoh ka dee saux muad an, ¹¹ an mawh jhawm saux sipawg pa prim piang hak tokaux nawh, cao giex kaing li tak krai pao nawh mawh pa ang singax mai ang lai gang nawh ot nongnong kheu mawh nawh pa ang singax. ¹² Phan jhawm saux sipawg hoik naog piang pui saux an, jah ka kaing tom hoek ka caong, yam hoek cao giex kaing li ti jhak ciied ka nawh see dee mawx angah, ¹³ Khaix an, phan jhawm saux sipawg hoik pon ti tah ka tokaux nawh, nawh tak krai pao pui saux an mawh pui singax. ¹⁴ Viang mawh nan, yam deeh lih saux nex raoh ankix piang nawh yam mawx angah, tak deeh mawh pa ang singax kah. ¹⁵ Cao giex kaing li tak jhak ciied ka nex saux raoh an mai krai pao nawh mawh pa ang singax. Mawh kheu nex saux raohan mawh pa ang

singax, an mawh jhawm saux sipawg. ¹⁶ Phan nex saux raoh an deeh tiehloh ti paing, nawh tak hoek ka cao giex kaing li, ¹⁷ cao giex kaing li tak jhak ciied ka nawh mai phan saux nawh lih ti paing, khaix an cao giex kaing li tak krai pao nawh mawh pa singax. ¹⁸ Phan jhawm saux muad lih ti koe piang nex hak nawh mai phan deeh moi, ¹⁹ jhawm saux dao pa paing angah, jhawm saux pa dee raoh mai dee paing angah, koe ka dee saux muad an, khaix an nawh tak mawh pa jhi tix ka cao giex kaing li ²⁰ mai cao giex kaing li tak jhak ciied kah, phan yaox raux laig jhawm saux daux hak nawh mai phan hauk nawh tieh ti paing, cao giex kaing li tak krai pao nawh mawh pa ang singax, an mawh jhawm saux sipawg pa hoik lih khaing jhawm saux muad nawh. ²¹ Viang mawh nan, phan cao giex kaing li jhak ciied ka ankix mai yaox ka ang hauk paing lai koe mai hoik grai hu, khaix an cao giex kaing li tak gang nawh ot nongnong aliah ngaix, ²² Phan jhawm saux an hoik tah piang kaux hak nawh khawmuik, cao giex kaing li tak krai pao nawh mawh pa ang singax, an mawh jhawm saux sipawg. ²³ Viang mawh nan, phan khaix rhoi dee saux an koe ka daux tix dah nongnong mai ang prunprang ti tah hu tangdah, an mawh rhoi khaix saux muad mai cao giex kaing li tak krai pao nawh mawh pa singax. ²⁴ "Phan dee saux khaix hax ngu koe ka tokaux nawh mai khaix hax an mawh dee saux dao mai lih ti raoh angah, paing angah, ²⁵ cao giex kaing li tak jhak ciied ka an mai phan hauk pa koe ka dee saux dao an tieh ti mawh pa paing mai raux greem hak nawh, an mawh saux sipawg pa pon nawh khaing krax saux hax ngu, cao giex kaing li tak krai pao nawh mawh pa ang singax, an mawh jhawm saux sipawg. ²⁶ Viang mawh nan phan cao giex kaing li jhak ciied ka an mai phan hauk paing nawh khankix ang koe ka daux dee saux dao mai dee saux an ang tie mawh pa raux greem hak mai hoik deeh grai, khaix an, cao giex kaing li tak gang nawh ot nongnong aliah ngaix. ²⁷ Cao giex kaing li tak deeh jhak ciied

ka nawh, yam hoek aliah ngaix, phan saux an tah piang hak kaux nawh, khaix an cao giex kaing li tak krai pao nawh mawh pa ang singax, an mawh jhawm saux sipawg.²⁸ Phan dee saux dao an kawn koe daux tix dah mai ang nyang tah piang hak kaux nawh mai hoik deeh grai, an mawh saux khaix hax ngu, cao giex kaing li tak krai pao nawh mawh pa singax, mawh ngie khaix rhoi saux nawh khaing pa hax ngu.²⁹ Simex angah, sibun angah, phan koe krax saux piang kaing nawh, phan ang mawh nan, piang hauk bheup nawh,³⁰ khaix an cao giex kaing li tak jhak ciied ka jhawm saux an mai phan jhawm saux raux ka greem hak nawh mai koe hauk lheur rhi ka plak daux, khaix an cao giex kaing li tak krai pao nawh mawh pa ang singax, an mawh jhawm saux maux sipawg ka kaing nawh, phan ang mawh nan, ka bheup nawh.³¹ Cao giex kaing li jhak ciied jhawm saux maux an mai phan dee saux an ang tie raux ka hak kaux nawh mai hauk lheur kawx ang tie koe daux saux an, khaix an cao giex kaing li tak gang pui saux an ot nongnong aliah ngaix.³² Yam hoik hoek ka daux aliah ngaix, cao giex kaing li tak jhak ciied ka jhawm saux nawh, phan jhawm saux maux ang nyang tah mai hauk lheur ang nyang koe ka daux nawh mai jhawm saux maux an ang nyang raux plak greem hak,³³ nawh tak khlaho hauk tix, viang mawh nan, nawh tak ang pon ti khlaho ka dee koe jhawm saux maux an mai cao giex kaing li tak baox gang ka pui saux an ot nongnong aliah ngaix.³⁴ Yam hoik hoek daux aliah ngaix, cao giex kaing li tak deeh jhak ciied ka dee koe jhawm saux maux mai phan jhawm saux maux ang nyang tah piang hak kaux nawh mai ang raux ka greem hak nawh, cao giex kaing li tak krai pao nawh mawh pui pa singax, nawh tak sidaux kraung tix mai nawh mawh pa singax.³⁵ Viang mawh nan, phan jhawm saux maux an deeh tah piang hak kaux nawh, khaix hoik singax nawh,³⁶ cao giex kaing li tak deeh jhak ciied ka nawh mai phan jhawm saux maux hoik tah piang hak kaux nawh cao giex kaing li

tak ang lo ti jhak ciied ka hauk lheur, nawh mawh pa ang singax.³⁷ Phan jhawm saux maux lih ti koe tix dah ngie mai hauk lung kuah kah, jhawm saux maux an hoik pon ti moi, nawh mawh pa singax mai cao giex kaing li tak krai pao nawh mawh pa singax.³⁸ Simex angah, sibun angah phan koe jhawm saux dao ka hak tokaux nawh, pa mawh jhawm saux dao pa paing hak khankix,³⁹ cao giex kaing li tak jhak ciied ka nawh mai phan jhawm saux dao an ang tie paing, an mawh saux dao pa koe piang hak nawh mai nawh mawh pa singax.⁴⁰ Phan pui mawx greeig hauk kaing, an mawh pui pa pak kaing, viang mawh nan, nawh mawh pui pa singax.⁴¹ Pui pa hoik greeig hauk kaing khaing dongre nawh, nawh mawh pui pa pak dongre, viang mawh nan, nawh mawh pui pa singax.⁴² Phan khaix rhoi saux pa raoh mai pa paing koe piang kaing pak nawh angah, piang dongre nawh angah, an mawh jhawm saux sipawg pa lih piang kaing nawh mai piang dongre nawh.⁴³ Khaix an, cao giex kaing li tak jhak ciied ka nawh mai phan dee saux nawh raoh mai paing piang kaing pak nawh angah, piang dongre nawh angah, awm grang jhawm saux sipawg piang hak tokaux nawh,⁴⁴ nawh mawh pui pa saux sipawg, nawh mawh pa ang singax, cao giex kaing li tak krai pao nawh mawh pa ang singax jao jhawm saux pa koe piang kaing nawh.⁴⁵ Yam in, kix tak riah kraung ceep pui pa koe jhawm saux sipawg an mai kieh nawh bhang kaing tix mai nawh tak kheem siyiep jheeh plak piang tix mai riagyo ti ah nin, "Ang singax, ang singax".⁴⁶ Glang koe jhawm saux nawh, nawh tak mawh pa ang singax mai nawh tak yaox ti ot nongnong plak praix nyiex bang.

Been Kraung Ceep Pui Saux Sipawg

⁴⁷ Kraung pa hoik kawb jhawm saux sipawg ka pa mawh kraung haukyung angah, kraung ceep man angah,⁴⁸ viang mawh keei pa taing angah, maox pa sang taing angah, man angah, hauk yung angah, hak angah mai canceu pa yuh ka hak angah,⁴⁹ Phan jhawm saux an klai angah, raoh angah hoik koe piang kraung ceep angah, piang hak angah, viang mawh

piang keei pa taing anghah, maox pa sang taing anghah mai kraung pa sang yuh ka hak anghah, an mawh jhawm saux sipawg, tak mawh pa hu jhi tix ka cao giexkaingli.⁵⁰ Cao giex kaing li tak jhak ciied ka jhawm saux an mai deuh kraung pa koe jhawm saux an nongnong aliah ngaix.⁵¹ Yam hoek daux aliah ngaix, nawh tak deeh jhak ciied ka jhawm saux an, phan jhawm saux an hoik tah piang kraung ceep nawh, pa mawh keei taing anghah, maox pa sang taing anghah mai hak anghah, canceu kraung pa yuh ka hak anghah, jhawm saux sipawg an mawh pakieh nawh koe jhawm saux, an mawh pa ang singax.⁵² Kraung ceep pa koe jhawm saux sipawg pa mawh keei pa taing anghah, maox pa sang taing anghah, hauk yung mai man anghah, kraung ceep hak mai kraung pa yuh ka hak anghah, mawh kheu koe jhawm saux sipawg piang nawh, an tak mawh pa gleeing daux ngu.⁵³ Cao giex kaing li tak jhak ciied mai phan jhawm saux sipawg an ang nyang pon ti tah piang kraung ceep khankix, pa mawh keei taing anghah, maox pa sang taing anghah mai piang kraung pa hoik yuh ka hak,⁵⁴ khaix an cao giex kaing li tawx lox ka kix, sonsang sidaux kix kraung pa koe jhawm saux sipawg mai tak baox deeh deuh tix yaox kraung ankix aliah ngaix.⁵⁵ Khaix an, cao giex kaing li tak jhak ciied ka jhawm saux sipawg khaix hoik sidaux kix kraung tix mai phan jhawm saux sipawg an, ang nyang tiehloh tix, viang jhawm saux sipawg an ang nyang pon ti tah kudah kawx, an mawh pa ang singax mai mawh jhawm saux pa sium ka plak daux anghah, plak praix anghah maix tak gleeing ti tik canceu kraung ankix ka ngu.⁵⁶ Phan cao giex kaing li hoik jhak ciied mai phan jhawm saux sipawg kawm lung, khaix hoik sidaux kix kraung, keei pa taing anghah, maox pa sang taing anghah mai kraung ceep pa yuh ka hak anghah tak riah ka dee koe jhawm saux an heue.⁵⁷ Viang mawh nan, phan jhawm saux sipawg an kawm deeh koe piang kraung ceep, keei pa taing anghah, maox pa sang taing anghah mai can kraung hak anghah, an mawh jhawm saux sipawg pa sang tah hu,

pex tak gleeing kraung pa koe jhawm saux sipawgan ka daux ngu.⁵⁸ Kraung ceep pa hoik sidaux maix, keei pa taing anghah, maox pa sang taing anghah mai can kraung pa yuh ka hak anghah, phan jhawm saux sipawg hoik grai hu khaing piang kraung an khankix, khaix an nawh tak deeh sidaux kraung an ra bawg tix bawg mai an tak mawh pa singax.⁵⁹ In mawh been son jhawm saux sipawg pa koe piang kraung ceep, pa mawh hauk yung mai man khankix, viang mawh pa koe piang keei pa taing anghah, maox pa sang taing anghah mai can kraung pa yuh ka hak anghah, sonsang krai pao mawh pa singax, phan ang mawh nan, sonsang krai pao mawh pa ang singax heue.

14 *Grawng Been Khaix Singax Saux Sipawg*
 Simiang Siyiex ah nin ka Mose,² In tak mawh grawng been son pui pa saux sipawg, khaix hoik hoek daux singaix pa singax nawh, kix tak viex nawh hoek ka cao giex kaing li,³ cao giex kaing li lih hu ka praix nyiex bang mai cao giex kaing li jhak ciied ka nawh, phan pui saux sipawg an hoik moi khaing jhawm saux,⁴ Cao giex kaing li tak tawx lox sonsang teei kix kawm sim pa im pa singax ra mu, khaox Arit mai maox keei raoh rawt khawm rao taux im krim son pui pa sang deeh singax an.⁵ Cao giex kaing li tawx lox tix sonsang pah kix sim an tix mu ka daux aw tiex pa hoik kin ti sau khaing rawm lih hu.⁶ Cao giex kaing li teei sim pa kawm im an mai khaox Arit mai maox keei raoh rawt mai rao taux im krim, cob ankix tau mai sim pa im ka daux rawm nham sim pa hoik pah kix ka daux rawm lih hu pa hoik kin kix,⁷ phruah an aliah bawg piang pui pa sang deeh tak krai pao nawh mawh pa singax mai ploi sim im an ka haktiex praix dee yi.⁸ Pui pa sang deeh kieh nawh mawh pa singax, tak yaox ti sidaux kraung ceep tix mai khlaho hauk tix khawmuik mai heem tix sonsang mawh nawh pa singax, khaix hoik an, nawh tak laig ka daux nyiex bang mai nawh tak yaox ti ot plak praix nyiex gox tix aliah singaix.⁹ Yam hoik hoek ka daux aliah ngaix, nawh tak baox khlaho hauk kaing tix mai hauk bheup khawm

hauk ngai tix, nawh tak khlaho ti tik hauk tix khawmuik, nawh tak sidaux kraung ceep tix mai heem tix mai nawh tak mawh pasingax.¹⁰ Yam hoik hoek ka daux daix ngaix, nawh tak teei kawn yung mhaing ra mu, pa ang koe dee mat dee ne mai kawn yung shiang pa taug naog num tix mu, pa ang koe dee mat dee ne mai baoux teei phawng ngox ca im pa jiet mhawm loe son khaing kao son ka daux tix epha, pa hoik klao tau mai bee son krax tan ceu pa ih mai bee tix lawga.¹¹ Khaix an cao giex kaing li pa yuh krax singax ka nawh, tak viex pui pa sang kieh nawh mawh pa singax hoek tau mai ceu an khankix sivoe Siyiex, ka daux diang siviex nyiex gox buan man bang kum pui hun.¹² Cao giex kaing li tak teei kawn yung mhaing tix mu mai tan son krax tan pa pluatploi pa lud tau mai bee tix lawga mai yangyeuh ankix son krax tan yangyeuh sivoe Simiang Siyiex.¹³ Khaix an nawh tak pah kawn yung an ka dee pah nawh totan pa pluatploi phimap mai totan pa gleeing ka dahdee pa singax singeh, mawh kheu krax tan pa pluatploi pa lud, mawh cie cao giex kaing li awm krax tan son pa pluatploi phimap, an mawh pa kied singax.¹⁴ Cao giex kaing li tak teei nham tixblauh khaing krax tan pa deeh pluatploi pa lud mai cao giex kaing li tak kraix nham an piang dawng yhaok plak dawm pui pa sang deeh kieh mawh pa singax mai piang giien ting taix dawm nawh mai giien ting caong plak dawm nawh.¹⁵ Cao giex kaing li tak teei bee tixblauh khaing daux tix lawga mai hieh ka daux tawm taix khawn goix tix.¹⁶ Khaix an, cao giex kaing li cob giien taix khawn dawm tix ka daux bee pa koe ka daux tawm tai plak goix mai nawh tak phruah bee an tixblauh ka giien taix tix aliah bawg sivoe Simiang Siyiex.¹⁷ Cao giex kaing li tak kraix bee pa kawn deuk daux tawm taix tix tixblauh piang dawng yhaok khawn dawm pui pa sang deeh kieh singax an mai piang giien ting taix khawn dawm nawh, khawm piang giien ting caong khawn dawm nawh mai piang dee kraix nham krax tan pa pluatploi pa lud.¹⁸ Cao giex kaing li kraix bee pa kawn deuk an daux

tawm taix tix piang kaing pui pa sang deeh kieh nawh mawh pa singax, mawh kheu nan, cao giex kaing li tak yuh krax khioxkhaw pa pluatploi son nawh sivoe Simiang Siyiex.¹⁹ Khaix an, cao giex kaing li tak tan krax tan pa pluatploi phimap mai yuh krax pa khioxkhaw mai krax pa pluatploi son pui pa sang deeh kieh nawh mawh pa singax khaing krax pa ang nawh nyang singax, khaix hoik ceu ankix, nawh tak pah ka tobrie krax tan pa gleeing.²⁰ Cao giex kaing li tak tan krax tan pa gleeing mai krax tan ceu pa ih piang khu dee tan, mawh kheu nan, cao giex kaing li tak yuh krax khioxkhaw mai krax pa pluatploi son nawh mai nawh tak mawh pa singax.²¹ Viang mawh nan, phan nawh mawh pa hot sia mai ang pon tawx ceu ankix, khaix an, tak teei kawn yung mhaing tix mu son krax tan pa pluatploi pa lud pasangyangyeuh maisonsang yuh krax khioxkhaw mai krax pa pluatploi son nawh mai tak teei phawng nghox ca pa mhawm kao son tix son khaing tix epha pa hoik klao tau mai bee, son krax tan ceu pa ih mai bee tix lawga²² mai sikaux ra mu anghah, kawn keukie ra mu anghah, son krax tan pa pon nawh ti tan, tix mu tak mawh son pa pluatploi phimap mai an tix mu tak mawh son krax tan pa gleeing.²³ Nawh tak viex an khankix hoek ka cao giex kaing li, yam hoik hoek ka daux daix ngaix, son krax pa sang dee singax nawh, ka diang siviex nyiex gox buan man bang kum pui hun sivoe Siyiex.²⁴ Cao giex kaing li tak teei kawn yung pa tan nawh son krax tan pa pluatploi pa lud mai bee tix lawga mai cao giex kaing li tak yangyeuh ankix, mawh krax tan pa yangyeuh sivoe Siyiex.²⁵ Khaix an nawh tak pah ka kawn yung, krax tan pa pluatploi pa lud mai cao giex kaing li tak teei nham krax tan pa pluatploi pa lud tixblauh mai kraix piang dawng yhaok khawn dawm pui pa sang deeh kieh nawh mawh pa singax mai piang giien ting taix khawn dawm, khawm piang giien ting caong khawn dawm.²⁶ Cao giex kaing li tak hieh bee an khankix tixblauh ka daux tawm taix khawn goix tix.²⁷ Khaix an cao giex kaing li tak phruah bee an khankix tixblauh ka giien taix

khawn dawm tix khaing pa koe ka daux tawm taix goix nawh aliah bawg sivoe ngai Simiang Siyiex.²⁸ Cao giex kaing li tak kraix bee an khankix, pa koe daux tawm taix tix tixblauh piang dawng yhaok khawn dawm pui pa sang deeh kieh nawh mawh pa singax an mai piang giien ting taix khawn dawm tau mai piang giien ting caong khawm dawm nawh mai piang dee hoik kraix kix nham krax tan pa pluatploi pa lud.²⁹ Cao giex kaing li tak kraix bee pa kawm deuk an, pa koe daux tawm taix nawh piang kaing pui pa sang deeh kieh nawh mawh pa singax mai nawh tak yuh krax khioxkhaw mai krax pluatploi son nawh sivoe Simiang Siyiex.³⁰ Nawh tak tan sikaux tix mu angah, kawm keukie tix mu angah, awm pa pon tan nawh,³¹ ka daux pa pon tan nawh, tix mu tak mawh son krax tan pa pluatploi phimap mai tix mu tak mawh son krax tan pa gleeing tau mai krax tan ceu pa ih. Mawh kheu nan, cao giex kaing li tak yuh krax pa khioxkhaw mai krax pa pluatploi son pui pa sang deeh kieh nawh mawh pa singax sivoe Simiang Siyiex.³² In mawh son pui pa hoik kham jhawm saux sipawg, pa ang pon yuh sonsang singax tix, awm pa koe grawng beenheue.”

***Been Pa Dexdawd Mai Nyiexma
Pui Saux Sipawg***

³³ Simiang Siyiex ah nin ka Mose,³⁴ “Yam hoik hoek pex ka daux haktiex Khanan pa tawx Aux ka pex mai phan jhawm saux sipawg koe ka daux nyiex tix lhang daux haktiex pa hoik kieh Aux pex pon ti cie³⁵ mai cao nyiex tak hoek ti kraik ka cao giex kaing li ah nin, aux hoik yaox pa koe jhawm saux sipawg tixblauh ka daux nyiex aux.³⁶ Khaix an, cao giex kaing li tak tawx lox sonsang grux gah kix kraung uik sivoe sang laig cao giex kaing li tix jhak ciied ka jhawm saux sipawg pa koe ka daux nyiex an khawmuik, tak ang pon ti yuh nawh mawh pa ang singax, khaix hoik ceu an khankix cao giex kaing li tak laig ti jhak ciied ka daux nyiex.³⁷ Nawh tak jhak ciied ka jhawm saux sipawg an mai phan jhawm saux sipawg hoik koe ka daux klawk ding nyiex, klai angah, raoh angah, viang

mawh nan, hoik raux laig ka daux ding,³⁸ khaix an cao giex kaing li tak lih plak praix nyiex ka daux diang siviex mai nawh tak nyeeep ti deuh nyiex an aliah ngaix.³⁹ Cao giex kaing li tak baoux hoek ti jhak ciied yam hoik hoek ka daux aliah ngaix mai phan jhawm saux sipawg an hoik tah piang ding nyiex,⁴⁰ Khaix an, cao giex kaing li tak tawx lox sonsang khut kix simaox an lih, pa koe jhawm saux sipawg mai kix tak teei ti tik ka dee pa ang singax ka plak praix veng.⁴¹ Kix tak khut plak daux vungviang nyiex khawmuik mai phawng tiex pa hoik khut an, tak khrawm ti tik ka dee pa ang singax plak praix veng.⁴² Khaix an, kix tak teei lon simaox tangdah mai sau ka daux dee pa hoik sivaoh kix simaox an khankix mai tak teei tiex ceu pa kraix mai deeh kab nyiex kah.⁴³ Phan jhawm saux sipawg deeh baoux lih ka daux nyiex, khaix hoik sivaoh kix lon simaox an hu dee singai mai khaix hoik khut kix ka daux nyiex mai khaix hoik deeh cox kawb kix ding,⁴⁴ khaixan cao giex kaing li tak deeh hoek ti jhak ciied, phan jhawm saux sipawg an hoik pon ti tah ka daux nyiex, jhawm saux an mawh pa chix haok mai an mawh pa ang singax.⁴⁵ Khaix an, nawh tak yieh nyiex, lon simaox, khaox mai can pa kab tix ka nyiex, tak gah plak praix veng ka dee pa ang singax.⁴⁶ Lheu khaing an, khaix hoik nyeeepkix ka nyiex, can pui pa hoiklaig daux nyiex, tak mawh pa ang singax tom hoek plak ponbo.⁴⁷ Can pui pa it mai pa ih nyaux ka daux nyiex an khankix, tak yaox ti sidaux kraung ceep tix.⁴⁸ Phan cao giex kaing li laig ka daux mai jhak ciied kah mai phan jhawm saux sipawg ang nyiex tah ka daux nyiex, khaix hoik deeh cox kawb kix ka nyiex, khaix an cao giex kaing li tak kraik pao nyiex an mawh pa singax, mawh kheu hoik grai jhawm saux sipawg.⁴⁹ Nawh tak teei sim ra mu mai khaox Arit mai maox keei pa raoh rawt khawm rao lhax im krim sonsang deeh yuh nawh nyiex singax.⁵⁰ Nawh tak pah sim tix mu ka daux aw tiex, pa hoik kin ti sau khaing rhawm lih hu,⁵¹ nawh tak teei khaox Arit mai rao lhax im krim khawm maox keei pa raoh rawt mai sim pa im tix mu mai

cob tau ka daux nham sim pa hoik pah tix ka daux rhawm lih hu pa hoik kinti deuh mai nawh tak phruah an khankix ka nyiex aliah bawg. ⁵² Nawh tak yuh nyiex an singax ka nham sim mai rhawm lih hu pa hoik kin mai sim pa im tau mai khaox Arit khawm rao lhax im krim mai keei raoh rawt. ⁵³ Khaix an, nawh tak deeh ploi sim pa im an ka plak praix veng ka daux kaung mai yuh krax pa khioxkhaw, krax pa pluatploi son nyiex an mai nyiex an tak mawh pa singax.” ⁵⁴ In mawh grawng been son jhawm saux sipawg kuceu mai son jhawm saux maux sipawg, ⁵⁵ son kraung ceep mai nyiex pa koe jhawm saux sipawg, ⁵⁶ jhawm saux muad mai jhawm saux dao khawm jhawm saux dao paing, ⁵⁷ sonsang chix tawng chix goih kah, yam ang singax mai yam singax, in mawh grawng been son jhawm saux sipawg heue.

15 *Been Jhawm Saux Lih Rawm Saux Yia*
 Simiang Siyiex ah nin ka Mose mai Arun, ² “Krai ka ceu pui Isarelaxkhankix ah nin, yam koe jhawm saux yia khaing tokaux simex, jhawm saux yia an mawh pa ang singax. ³ An tak mawh pa kieh nawh ang singax, kheu jao jhawm saux yia, phan rawm seeing kawn lih khaing tokaux nawh angah, phan hoik hit angah, an mawh pa ang singax. ⁴ Dee it pa hoik it pui pa koe jhawm saux yia an kawx mawh pa ang singax mai khaix ngawm nawh khankix kawx mawh pa ang singax. ⁵ Can pui pa hu krox, hu teeh ka kraung it nawh, tak yaox ti sidaux kraung tix mai heem rawm mai nawh tak mawh pa ang singax tom hoek plakbo. ⁶ Pui pa ngawm ka dee hoik ngawm pui pa koe jhawm saux an, tak yaox ti sidaux kraung ceep tix mai heem rawm mai nawh tak mawh pa ang singax tom hoek plakbo. ⁷ Pui pa hu krox, hu teeh ka tokaux pui saux an, tak yaox ti sidaux kraung ceep tix mai heem rawm mai nawh tak mawh pa ang singax tom hoek plakbo. ⁸ Phan pui pa koe jhawm saux an hu baik ka pui pa singax, pui an tak yaox ti sidaux kraung ceep tix mai heem rawm mai nawh tak mawh pa ang singax tom hoek plakbo. ⁹ An brug pui saux an kawx, tak mawh pa ang singax. ¹⁰ Can pui pa hu krox, hu

teeh ka kraung pa koe greem nawh tak mawh pa ang singax tom hoek plakbo, pui pa viex kraung ceu an hu, tak yaox ti sidaux kraung ceep tix mai heem rawm mai nawh tak mawh pa ang singax tom hoek plakbo. ¹¹ Phan pui pa koe jhawm saux an hu krox, hu teeh ka pui tix kaux kaux, yam ang nawh nyang khoek taix tix ka daux rawm, pui an tak yaox ti sidaux kraung ceep tix mai heem rawm mai nawh tak mawh pa ang singax tom hoek plakbo. ¹² Kraung aw tiex pa hoik krox hoik teeh pui saux an, tak pah max, tawg khaox kawx tak phakka rawm. ¹³ Yam hoik moi pui saux an khaing jhawm saux yia, nawh tak simin tix yaox tom hoek aliah ngaix son krax pa singax nawh mai nawh tak sidaux kraung ceep tix mai heem tokaux tix ka rawm lih hu, khaix an nawh tak mawh pa singax. ¹⁴ Yam hoik hoek daix ngaix, nawh tak tee sikaux ra mu angah, kawn keukie ra mu angah mai viex hoek sivoe Simiang Siyiex, hawt daux diang siyiex nyiex gox buan man bangkum pui hun mai tawx an ka cao giex kaing li, ¹⁵ cao giex kaing li tak tan an son krax tan pa pluatploi phimap tix mu mai son krax tan pa gleeing tix mu, cao giex kaing li tak yuh krax khioxkhaw mai krax pa pluatploi son nawh sivoe Simiang Siyiex jao jhawm saux yia nawh. ¹⁶ Phan simex lih rawm ngang, kieh nawh heem rawm mai nawh tak mawh pa ang singax tom hoek plakbo. ¹⁷ Kraung ceep mai kraung hak pa hoik krox rawm ngang kah, tak mawh pa sidaux ka rawm mai an tak mawh pa ang singax tom hoek plakbo. ¹⁸ Yam it simex tau mai sibun, phan rawm ngang nawh hoik pon ti lih, kiex khawm ra tak heem rawm, kiex mawh pa ang singax tom hoek plakbo. ¹⁹ Phan bun hoik hoek bawgyam lih nham mee bun, bun an tak mawh pa ang singax aliah ngaix mai can pui pa hu krox hu teeh ka bun an, tak mawh pa ang singax tom hoek plakbo. ²⁰ Can kraung it nawh glang lih nham mee bun nawh, tak mawh pa ang singax, canceu pa ngawm nawh piang khankix kawx tak mawh pa ang singax. ²¹ Pui mawx angah pa hu krox hu teeh ka kraung it nawh, tak yaox ti sidaux kraung ceep tix mai heem rawm mai nawh tak mawh pa

ang singax tom hoek plakbo. ²² Pui mawx angah pa hu krox hu teeh ka kraung pa hoik ngawm nawh kawx, tak yaox ti sidaux kraung ceep tix mai heem rawm mai nawh tak mawh pa ang singax tom hoek plakbo. ²³ Yam hu krox, hu teeh pui ka kraung pa koe ka dee it nawh angah, ka dee ngawm nawh angah, pui an tak mawh pa ang singax tom hoek plakbo. ²⁴ Phan simex it tau mai sibun, yam ang mee bun an nyang singax, pui an tak mawh pa ang singax aliah ngaix mai can kraung pa hoik it nawh kawx, tak mawh pa ang singax. ²⁵ Phan bun tix kaux koe jhawm saux lih nham rheung khaing bawgyam yie hoek nham pa ang singax nawh awm ku bawg mai phan hoik luan khaing bawg yam yie lih nham pa ang singax nawh angah, glang singaix kawn hoek jhawm saux lih nham an, tak deuh nawh awm singaix hoek nham bawgyam pa ang singax nawh, nawh tak mawh pa ang singax. ²⁶ Dee it nawh khawmuik glang singaix jhawm saux lih nham nawh, tak mawh dee it pa ang singax mai canceu pa ngawm nawh kawx tak mawh pa ang singax awm ang nawh singax. ²⁷ Can pui pa hu krox, hu teeh ka ceu an tak mawh pa ang singax, nawh tak yaox ti sidaux kraung ceep tix mai heem rawm mai nawh mawh pa ang singax tom hoek plakbo. ²⁸ Phan bun an hoik singax khaing jhawm saux lih nham seeing an, nawh tak simin tom hoek aliah ngaix, khaix an nawh tak mawh pa singax. ²⁹ Yam hoek daix ngaix, nawh tak teei sikaux ra mu angah, kawn keukie ra mu angah mai viex an hoek ka cao giex kaing li hawt daux diang siviex nyiex gox buan man bang kum pui hun. ³⁰ Khaix an cao giex kaing li tak tan an tix mu son krax tan pa pluatploi phimap mai son krax tan pa gleeing tix mu mai cao giex kaing li tak yuh krax khioxkhaw mai krax pa pluatploi son sibun an sivoie Simiang Siyiex, son jhawm saux lih nham seeing pa ang singax khaing nawh. ³¹ Mawh kheu nan maix tak tang goih ceu pui Isarelax khankix khaing pa ang singax kix, phan ang mawh nan, Aux lhat kix yum ka daux pa ang kix singax, yam kieh kix nyiex gox

buan man Aux seeing brai kheu pa mawh ceu pa koe ka daux sinax kix.” ³² In mawh been son pui pa koe jhawm saux lih nham seeing mai rawm ngang, nawh tak mawh pa ang singax, ³³ son sibun pa hoik pon jhawm saux lih nham seeing mai hoek bawgyam mee bun pa ang nawh singax, pa mawh simex angah, sibun angah mai son pui pa hoik it tau mai sibun pa ang singax heue.

Krax Khioxkhaw Mai Krax Pluatploi

16 Khaix hoik yum kawn simex Arun ra kaux, kheu jao pa tan kiex ngu pa seeing sivoie Simiang Siyiex. ² Simiang Siyiex ah nin ka Mose, “Krai ka puxke maix Arun, son ang nawh nieb hoek daux pa kied singax singeh jheengjheeng, ka plak daux man tie, sivoie danggeung krax pa cauxrhawm, pa koe piang teug buan, phan ang mawh nan, Aux lhat nawh yum kah, grawh grawng nawh, Aux tak sang plak jhi Tix ka daux paiawm, pa koe piang dawb teug buan, ka danggeung krax pa cauxrhawm. ³ Arun tak laig ka daux dee pa singax singeh mai kawn mawie mhaing tix mu son krax tan pa pluatploi phimap mai kawn yung mhaing tix mu son krax tan pa gleeing. ⁴ Nawh tak ceep man sibex mhawm da plak daux pa singax singeh mai man khlay mhawm pa singax singeh piang tix, nawh tak nhawt nyoi tix ka maox rawd nyoi pa mhawm mai nawh tak ceep man lawk kaing pa mhawm, inkix mawh kraung ceep pa singax singeh, nawh tak heem rawm mai ceep kraung an khankix. ⁵ Nawh tak rieb ti teei kawn pex mhaing ra mu, khaing cub pui hun ceu pui Isarelax khankix, son krax tan pa pluatploi phimap mai kawn yung mhaing tix mu son krax tan pa gleeing. ⁶ Arun tak tan mawie mhaing son krax tan pa pluatploi phimap mai yuh krax pa khioxkhaw mai krax pluatploi son tokaux tix, khawm son kawn nyiex ma tix. ⁷ Nawh tak teei pex ra mu mai deuh ka sivoie Simiang Siyiex hawt diang siviex nyiex gox buan man bang kum pui hun. ⁸ Arun tak yuh niep son pex an ra mu, niep tix mu mawh son Simiang Siyiex mai niep an tix mu mawh son pa deeh ploi lih hu. ⁹ Arun tak viex pex son pa hoik caw niep cie

Simiang Siyiex hoek mai tan son krax tan pa pluatploi phimap. ¹⁰ Viang mawh nan, nawh tak viex pex pa cawniep pa pluatploi an hoek khawm im ka sivoe Simiang Siyiex, sonsang yuh krax khioxkhaw mai krax pa pluatploi ka an mai deeh ploi lih hu ka daux tiag, mawh pex pa hoik pon ti lawdluan. ¹¹ Arun tak viex mawie mhaing hoek son krax tan pa pluatploi phimap mai yuh krax pa khioxkhaw son tokaux tix mai son kawn nyiex ma nawh mai nawh tak pah mawie mhaing an, son krax tan pa pluatploi phimap, pa mawh son cie nawh. ¹² Khaix an nawh tak teei pan ngu, pa hoik naog gaox ngu khaing plak khu dee tan sivoe Simiang Siyiex mai ceu nyawng bhawng pa sioe bhawng naog daux tawm taix tix mai viex laig plak daux man tie. ¹³ Sau nyawng bhawng ka piang ngu sivoe Simiang Siyiex, sonsang kheem taox nyawng bhawng an piang danggeung krax cauxrhawm, pa koe ka plak piang teug pa kham mhairug, phan ang mawh nan lhat nawh yum kah. ¹⁴ Nawh tak teei nham mawie mhaing tixblauh mai phruah piang danggeung krax cauxrhawm ka giien taix tix, ka plak toh mai tak phruah nham tixblauh sivoe danggeung krax cauxrhawm ka giien taix tix aliah bawg. ¹⁵ Khaix an, nawh tak pah pex krax tan pa pluatploi phimap son pui khawmuik mai viex nham laig ka plak daux man tie mai nawh yuh nham an khankix awm hoik yuh nawh ka nham mawie mhaing mai phruah ka piang danggeung mai sivoe danggeung krax cauxrhawm. ¹⁶ Mawh kheu nan, nawh tak yuh krax pa khioxkhaw mai krax pa pluatploi, son dee pa singax singeh, kheu jao ang ceu pui Isarelix khankix singax mai kheu krax lud kix, khawm son phimap kix khawmuik. Nawh tak yuh krax pa khioxkhaw mai krax pa pluatploi son nyiex gox buan man bang kum pui hun, pa kawn koe sinax kix kheu ang kix nyang singax. ¹⁷ Jah yam laig Arun ti yuh krax khioxkhaw mai krax pluatploi ka dee pa singax singeh tom hoek bawgyam lih nawh plak praix son

kawn nyiexma nawh mai son cub pui hun ceu pui Isarelix khankix ka daux nyiex gox buan man, ang pon ti kieh pui ot ka daux tix kaux kawx. ¹⁸ Nawh tak lih hu ka khu dee tan sivoe Simiang Siyiex mai yuh krax khioxkhaw son an, nawh teei nham mawie mhaing tixblauh mai nham pex mhaing tixblauh mai kraix piang rung khu dee tan mai hawt rawb vungviang tan. ¹⁹ Phruah nham tixblauh piang khu dee tan aliah bawg ka giien taix tix mai kieh mawh pa singax mai kieh ceu pui Isarelix khankix singax khaing pa ang singax. ²⁰ Khaix hoik yuh krax khioxkhaw, krax pluatploi son dee pa singax singeh, son nyiex gox buan man bang kum pui hun mai khu dee tan, nawh tak viex pex pa im hoek, ²¹ Arun tak deuh taix tix khawm ra khawn piang pex im an mai krai doh ka grawng phimap ceu pui Isarelix khankix mai krax pa lud kix khawmuik, pa dex mai phimap kix khawmuik mai nawh tak plee ceu an khankix piang kaing pex mai kieh pui pa hoik laug kix viex pex an hu ka daux tiag mai ploi lih hu dee singai. ²² Pex an tak klawm phimap kix khawmuik mai hu plak ang pui ot mai nawh tak ploi pex an ka daux tiag. ²³ Arun tak laig ka daux nyiex gox buan man bang kum pui hun mai peeik sibex man mhawm pa ceep tix, yam laig nawh ka daux dee pa singax singeh mai prah an tan. ²⁴ Nawh tak heem rawm, ka daux dee pa singax singeh mai ceep kraung tix mai lih plak praix mai tan krax tan pa gleeing son tix mai krax tan pa gleeing son pui hun khankix yuh krax pa khioxkhaw mai krax pa pluatploi son tix mai son pui khankix. ²⁵ Nawh tak gleeing khlawp bee son krax tan phimap piang khu dee tan. ²⁶ Pui pa hu ploi ka pex pa pon krax pa lawdluan an, tak sidaux kraung ceep tix mai heem tokaux tix ka daux rawm, khaix an nawh tak pon tix laig ka daux nyiex bang. ²⁷ Nham mawie mhaing mai nham pex pa hoik viex kix laig plak daux dee pa singax singeh, sonsang yuh kix krax khioxkhaw mai krax pluatploi, nawh tak deeh viex an kix lih hu plak praix nyiex bang mai tak gleeing hak, nex mai roing khankix ka daux ngu. ²⁸ Pui pa hu gleeing ka ceu an

khankix, tak sidaux kraung ceep tix mai heem tokaux tix, khaix an nawh tak pon tix laig ka nyiex bang.²⁹ In mawh lox pingnyap son pex leeingju, yam hoek ka daux khix aliah, haok khix kao ngaix, pex tak tuah pa ih, viang mawh kawn meung haktiex cao pex angah, nyosinie pa hoek ti peung sinax pex tivud ticu angah, ka daux singaix an tak ang pon ti yuh kaing tix ceu kawx.³⁰ Grawh grawng nawh ka daux singaix an, cao giex kaing li tak yuh krax khioxkhaw mai krax pluatploi son pex, sonsang singax pex khaing phimap sivoie Simiang Siyiex.³¹ An mawh singaix tuah, sonsang lauxlee pex mai tuah pa ih tix, an mawh grawng been son pex leeingju.³² Cao giex kaing li pa hoik pon beeh glawm, pa hoik appong tokaux tix son kaing jhaw cao giex kaing li pa hoik plud tang keeing nawh, nawh tak yuh krax khioxkhaw mai krax pluatploi mai nawh tak ceep man sibex mhawm pa singax singeh.³³ Khaix an, nawh yuh krax khioxkhaw mai krax pluatploi son dee pa kied singax singeh mai nawh tak yuh krax khioxkhaw mai krax pluatploi son nyiex buan man bang kum pui hun mai son khu dee tan, nawh tak yuh krax khioxkhaw mai krax pluatploi son cao giex kaing li khankix, khawm son cub pui hun khawmuik.³⁴ In tak mawh lox pingnyap ka son pex leeingju, sonsang yuh pex krax khioxkhaw, krax pluatploi, son ceu pui Isarelaux khankix mai son phimap kix khawmuik tix num tix bawg. Arun hawt yuh awm gumlox pa hoik tawm Simiang Siyiex ka Mose heue.

17 *Grawng Pa Tan Nham*

Simiang Siyiex ah nin ka Mose,² "Krai ka Arun mai kawn simex nawh khankix mai ka ceu pui Isarelaux khankix ah nin, in mawh gumlox pa hoik tawx Simiang Siyiex.³ Phan pui Isarelaux khankix tix kaux kaux pah mawie, yung, pex angah ka daux nyiex bang, phan ang mawh nan, ka praix nyiex bang,⁴ mai phan ang viex ceu an hoek ka daux diang siviex nyiex gox buan man bang kum pui

hun sonsang tan ka Simiang Siyiex, sivoie nyiex gox buan man Simiang Siyiex, tak klup nham phimap an piang pui an, mawh kheu hoik kieh nawh nham lih, kix tak tik nawh khaing paox pui ceu nawh,⁵ ceu pui Isarelaux khankix, tak deeh viex krax pa appong kix ti tan, daux tiag, daux kaung mai kix tak viex khankix hoek hawt diang siviex nyiex gox buan man bang kum pui hun ka cao giex kaing li mai tan an khawmuik son krax tan pa nhim ka Simiang Siyiex.⁶ Cao giex kaing li tak phruah nham piang khu dee tan ka Simiang Siyiex, hawt diang siviex nyiex gox buan man bang kum pui hun mai gleeing khlawp bee son krax tan pa sioe bhawng ka Simiang Siyiex.⁷ Kix tak ang lai baoux yaox ti tan krax pa appong ka phicaux mai ang lai yaox ti ludvao mai paox tix, in tak mawh grawng been leeingju son doeh ru kix.⁸ Maix tak ah nin ka kix, can pui pa kaoh khaing nyiexma ceu pui Isarelaux khankix angah, nyosinie pa ot sinax pex angah, yam tan kix krax tan pa gleeing mai krax tan pa appong,⁹ phan ang viex ceu an khankix hoek hawt diang siviex nyiex gox buan man bang kum pui hun sonsang tan ka Simiang Siyiex, tak tik nawh khaing paox pui ceu nawh.¹⁰ Can pui daux nyiex ma ceu pui Isarelaux khankix angah, nyosinie pa ot sinax pex angah, phan nawh ih nham Aux tak veeh pakngai Tix khaing pui an mai Aux tak tik nawh khaing paox pui ceu nawh.¹¹ Mawh kheu ju pa im koe ka daux nham mai Aux hoik tawx an ka pex piang khu dee tan, sonsang mawh pa yuh krax pa khioxkhaw mai krax pluatploi son ju pex, grawh grawng nawh an mawh nham pa yuh krax pa khioxkhaw mai krax pa pluatploi son ju.¹² Mawh kheu nan, Aux hoik ah nin ka ceu pui Isarelaux khankix, pui mawx angah ka daux pex tak ang pon ih nham mai nyosinie pa ot mai pex kawx tak ang pon ti ih nham.¹³ Ceu pui Isarelaux khankix angah, nyosinie pa ot sinax pex angah, hu leue totiag mai pon sim angah sonsang ih an, nawh tak tee ti tik nham mai kheem ka phawng tiex.¹⁴ Grawh grawng nawh, nham mawh ju son tokaux khawmuik, kheu mawh nham pa priex jung ju nawh, mawh kheu nan, Aux ah nin ka ceu pui Isarelaux khankix,

16:29-34 Krub 23:26-32; Si 29:7-11. 17:10 Yam 9:4; Krub 7:26-27; 19:26, Pi 2:16, 23, 15:23. 17:11 He 9:22.

pex tak ang pon ti ih nham pa kaoh khaing tokaux tix ceu kawx, mawh kheu ju pa im tokaux khawmuik koe ka dauh nham, can pui pa ih ka nham tak mawh pa teei ti tik. ¹⁵ Pui kukaux pa ih ka nex tobrie pa tang yum angah, nex pa hoik kiied tobrie bliex angah, viang nawh mawh pui pa keh dauh haktiex pex angah, nyosinie angah, nawh tak yaox ti sidaux kraung ceep mai heem rawm mai nawh tak mawh pa ang singax tom hoek plakbo, khaix an nawh tak mawh pa singax. ¹⁶ Viang mawh nan, phan nawh ang sidaux, ang heem tix, nawh tak kham geu ka phimap tix heue.

18 *Ang Cu Ludvao Ka Paox Tix*

Simiang Siyiex ah nin ka Mose, ² "Krai ka ceu pui Isarelix khankix ah nin, Aux mawh Simiang Siyiex, pa mawh Siyiex pex. ³ Pex tak ang pon ti yuh awm jhawm pa hoik yuh pex ka dee hoik ot pex ka dauh meung Ejiptux mai pex tak ang pon ti yuh awm jhawm pa hoik yuh pex ka dauh meung Khanan dee viex Aux pex hoek, pex tak ang pon ti hawt been cie kix. ⁴ Pex tak hawt lox tat jhawm prawng Aux mai hawt grawng lawng khaix been krax ot krax koe Aux mai hu ka dauh been an khankix. Aux mawh Simiang Siyiex, pa mawh Siyiex pex. ⁵ Mawh kheu nan pex tak priex ti hawt lox pingnyap Aux mai lox tat jhawm prawng Aux, phan pui tix kaux kaux hawt ti yuh awm an, nawh tak im ju kah, Aux mawh Simiang Siyiex. ⁶ Pex tak ang pon ti dexdawd mai paox ru tix tix kaux kawx, son ang pex pon plih tokaux kahkaong nawh, Aux mawh Simiang Siyiex. ⁷ Maix tak ang pon ti yuh krax kaig tua ka keeing tix mai ka miex tix, maix tak ang pon ti plih tokaux kahkaong krax kaig tua miex tix mai ludvao ka nawh, kheu mawh nawh miex maix. ⁸ Maix tak ang pon ti plih tokaux kahkaong miex seeb tix mai ludvao ka nawh, an mawh krax pa kaig tua keeing maix. ⁹ Krax pa kaig tua pux bun maix mai puxkebun maix pa mawh kawn sibun keeing maix angah, kawn sibun miex maix angah, viang kix mawh pa keh ka dauh nyiex angah, dee mawx angah

maix tak ang pon plih tokaux kahkaong pa kaig tua kix. ¹⁰ Krax pa kaig tua kawn saux bun maix, plak kawn simex angah, kawn saux bun plak kawn sibun angah mai tak ang pon ti plih tokaux kahkaong pa kaig tua kix, mawh kheu cie kix mawh krax pa kaig tua son maix. ¹¹ Kawn sibun pa hoik pon keeing maix khaing moeng tix, hoik mawh nan maix, maix tak ang pon ti plih tokaux kahkaong krax pa kaig tua nawh. ¹² Maix tak ang pon ti plih tokaux kahkaong pa kaig tua nan keeing maix, nawh mawh pa dex mai ru nex nham keeing maix. ¹³ Maix tak ang pon ti plih tokaux kahkaong pa kaig tua puxke bun miex maix, mawh kheu bun an mawh pa dex mai ru nex nham miex maix. ¹⁴ Maix tak ang pon ti kieh keeing ting tix koe krax kaig tua mai ang pon ti dexdawd mai moeng nawh, kheu mawh nawh miex ting maix. ¹⁵ Maix tak ang pon ti plih tokaux kahkaong pa kaig tua mun maix, nawh mawh moeng kawn simex maix, maix tak ang pon ti plih tokaux kahkaong pa kaig tua nawh. ¹⁶ Maix tak ang pon ti plih tokaux kahkaong pa kaig tua moeng puxke tix mai moeng pux tix, an mawh krax pa kaig tua puxke maix khawm pux maix. ¹⁷ Maix tak ang pon ti plih tokaux kahkaong pa kaig tua bun tix kaux mai kawn bun nawh, maix tak ang pon ti teei kawn saux bun pa keh khaing kawn simex nawh angah, kawn saux bun pa keh khaing kawn sibun nawh angah, son pa sang plih tokaux kahkaong pa kaig tua nawh, kix mawh pa dex mai ru nex nham nawh, in mawh pa seeing brai. ¹⁸ Maix tak ang pon ti plih tokaux kahkaong ka pux o moeng maix mai ang pon teei ti moeng ka kiex yam kawn im ju moeng maix. ¹⁹ Maix tak ang pon ti dexdawd tau mai sibun, sonsang plih tokaux nawh kahkaong mai krax pa kaig tua nawh yam kawn lih nham mee bun nawh. ²⁰ Maix tak ang pon ti tau mai moeng paox plawg tix, pa kieh maix tokaux tix seeing brai. ²¹ Maix tak ang pon ti kieh doeh ru tix, tix kaux kawx, hu krub ka siyiex Mulawk ka ngu, maix tak ang pon ti kieh ceukaux Siyiex

18:5 Ne 9:29, Yez 18:9, 20:11-13, Luk 10:28, Ro 10:5, Ka 3:12. 18:8 Krub 20:11, Pi 22:30, 27:20. 18:9 Krub 20:17, Pi 27:22. 18:12-14 Krub 20:19-20.

18:15 Krub 20:12. 18:16 Krub 20:21. 18:17 Krub 20:14; Pi 27:23. 18:19 Krub 20:18. 18:20 Krub 20:10. 18:21 Krub 20:1-5.

maix, mawh pa seeing brai, Aux mawh Simiang Siyiex. ²² Maix tak ang pon ti it tau mai paox simex tix mai ludvao ka nawh, awm ludvao maix ka bun, an mawh pa seeing brai. ²³ Maix tak ang pon ti ludvao ka tobrie, pa kieh tokaux maix seeing brai, bun kawx tak ang pon tix cung sivoie tobrie sonsang ludvao tau, in mawh krax pa ludloe tete. ²⁴ Paw doh kieh tokaux pex seeing brai tau mai ceu in khankix. Grawh grawng nawh, kheu jao inkix khawmuik, ceu pui pa hoik grheu Aux kix lih hu khaing plak sivoie ngai pex khankix, hoik seeing brai ka ceu in. ²⁵ Meung haktiex kix hoik seeing brai, mawh kheu nan, Aux tak hoek mai ciyang ka phimap kix mai haktiex tak hao ti tik kawn praix pa ot baoh an khankix. ²⁶ Mawh kheu nan, pex tak hawt gumlox been Aux mai lox tat jhawm prawng Aux mai pex tak ang pon ti lud ka pa seeing brai in khankix tix ceu kawx mai pui ceu pex tix kaux kaux angah, nyosinie pa ot sinax pex angah, tak ang pon ti lud ka an khankix. ²⁷ Grawh grawng nawh, can pui pa hoik ot sivoie pex ka dauh haktiex an, hoik yuh pa seeing brai inkix khawmuik, mawh kheu nan haktiex hoik seeing brai kah. ²⁸ Aux lhat haktiex deeh hao ti tik pex, yam yuh pex krax pa seeing brai awm hao haktiex ti tik ceu pui pa hoik ot sivoie pex khankix. ²⁹ Pui pa lud ka pa seeing brai in khankix mai pui pa lud ka ceu an, tak mawh pa teei ti tik nawh khaing dauh sinax pui ceu nawh. ³⁰ Mawh kheu nan, pex tak priex ti hawt been cie Aux, son ang pex lud ka pa seeing brai in khankix, pa hoik lud kix sivoie pex mai paw doh kieh tokaux pex seeing brai ka ceu an, Aux mawh Simiang Siyiex pex heue.

19 *Been Pa Singax Mai Pa Rahsee*

Simiang Siyiex ah nin ka Mose, ² Krai ka cub pui hun ceu pui Isarela khankix ah nin, pex tak mawh pa singax singeh, kheu mawh Aux Simiang Siyiex pex pa singax singeh. ³ Pex kukaux tak yungyi ka miex keeing tix mai priex ti hawt singaix tuah Aux, Aux

mawh Simiang Siyiex pex. ⁴ Paw doh veeh ti krub rieanggrang mai paw raug ti yuh rieanggrang siyiex khankix son tokaux pex awx. Aux mawh Siyiex pa mawh Simiang Siyiex pex. ⁵ Phan pex tan krax pa appong son krax tan pa nhim ka Simiang Siyiex, pex tak tan an khankix, sonsang mawh pa pon rieb ti teei. ⁶ An tak mawh pa ih ka dauh singaix tan pex mai singaix khaix mai phan ankix kawn deuk tom hoek loe ngaix, tak gleeing ti tik ka dauh ngu. ⁷ Phan pex ih an khawmuik, yam hoek dauh loe ngaix, an mawh pa seeing brai, tak mawh pa ang pon ti rieb kah. ⁸ Pui pa ih an khankix tak yaox ti kham geu phimap tix, mawh kheu hoik yuh nawh krax pa seeing brai ka krax tan pa singax singeh cie Simiang Siyiex mai tak tik pui an khaing pui ceu nawh. ⁹ Yam vawg pex nghox dauh kaung tix, pex tak ang pon ti vawg pa koe dauh kaung khawmuik, pex tak ang pon ti khrawm nghox pa cod pa kawn deuk khaix tix khankix. ¹⁰ Maix ang pon ti kloie pieh plix siiet tix khawmuik khaing dauh sipeem plix siiet, maix ang pon ti khrawm plix siiet, pa cod pa rau khaing sipeem plix siiet tix, maix tak prah son pui hot sia mai nyosinie, Aux mawh Siyiex pa mawh Simiang Siyiex pex. ¹¹ Maix ang pon ti briex, ang pon ti sikah lox pa ang mawh ang meh mai ang pon tix pielhen ka paox tix tix kaux hoik tix kaux. ¹² Maix ang pon ti tiexu pa ang mawh ang meh ka dauh ceukaux Aux, maix tak ang pon ti yuh ceukaux Siyiex maix mawh pa seeing brai, Aux mawh Simiang Siyiex. ¹³ Maix ang pon ti kheem gut ka paox plawg tix mai ang pon ti tudrhim ka kraung khrai nawh, mau ngawh riang gang, pui pa vai maix nawh yuh kaing khankix tak ang pon ti koe ka maix leeingsawm tom hoek plak ponngawb. ¹⁴ Maix ang pon ti jhaxlawg ka pui palheet mai ang pon ti deuh ceu pa sideeing caong sivoie pui pa dugngai, maix tak koe krax lhat graung ka Siyiex maix, Aux mawh Simiang Siyiex. ¹⁵ Pex ang pon ti yuh pa ang rahsee, ka dauh krax pa prawng see, maix

18:22 Krub 20:13. 18:23 Lih 22:19, Krub 20:15-16, Pi 27:21. 19:2 Krub 11:44-45, 1Pet 1:16. 19:3 Lih 20:12, Pi 5:16, Lih 20:8, Pi 5:12. 19:4 Krub 26:1, Lih 20:4, 34:17, Pi 5:8, 27:15.

19:9-10 Krub 23:22, Pi 24:19-22. 19:11 Lih 20:15, Pi 5:19, Lih 20:16, Pi 5:20. 19:12 Lih 20:7, Pi 5:11, Mat 5:33. 19:13 Pi 24:14-15. 19:14 Pi 27:18.

ang pon ti nunai pui pa hot sia, awm an maix ang pon ti jhak ka pakngai pui ting lhaong mai tak prawng see ka paox plawg tix ka daux pa rahsee.¹⁶ Maix ang pon ti hu lailing salao ti kraigrawng pui, daux sinax pui ceu maix, maix ang pon keud ti yuh pa koeng riang ciang khoi mai kieh paox plawg tix yum kah, Aux mawh Simiang Siyiex.¹⁷ Maix ang pon ti koeng ka puxaik tix daux rhawm tix, maix tak sidieix gau ka paox plawg tix mai son ang maix kham geu phimap kheu jao nawh.¹⁸ Maix ang pon ti pawk bix mai ang pon ti koeng riang ciang khoi ka kawn praix pui ceu maix khankix, maix tak moh ka paox plawg tix, awm moh maix tokaux tix, Aux mawh Simiang Siyiex.¹⁹ Maix tak priex ti hawt gumlox been cie Aux, maix ang pon ti kieh tobrie pa eei tix lih ti koe kawn tau mai pa ang mawh paox ceu nawh, maix ang pon ti rhuat simie pa hoik khon ti tau ka daux kaung maix, maix ang pon ti ceep kraung pa khao ti ka keei mai hauk yung.²⁰ Phan pui it mai bun siliex pa hoik chawk pui mai pa ang nyang pon ti deeh taoh deeh ploi ka nawh, son grawng ceu inkix kiex khawm ra tak pon pa ciyang, viang mawh nan, tak ang pon ti pah kiex yum kheu jao mawh bun siliex pa ang nyang pon krax pa lawduan.²¹ Simex an tak yaox ti viex kawn yung mhaing tix mu son krax tan pa pluatploi pa lud hoek ka Simiang Siyiex hawt diang siviex nyiex gox buan man bang kum pui hun.²² Cao giex kaing li tak yuh krax pa khioxkhaw mai krax pa pluatploi son nawh mai kawn yung mhaing krax tan pa pluatploi pa lud sivoe Simiang Siyiex, son phimap pa hoik yuh nawh mai phimap pa hoik yuh nawh tak pon krax pa pluatploi son nawh.²³ Yam hoek pex ka daux Khanan mai yam hoik sum pex khaox plix pa ih kuceu khawmuik, khaix an, pex tak deuh ti tawng khaox plix cie pex mai deuh awm khaox pa ang nyang pat hak, ka daux loe num plix khaox an tak awm pa ang pat hak tix ka son pex, an tak mawh pa ang pex pon ti ih kah.²⁴ Yam hoek ka daux num pon, plix khaox an

khawmuik tak mawh pa singax singeh mai son pa yaogyaw ka buanson Simiang Siyiex.²⁵ Yam hoek ka daux num phuan, pex tak pon ti ih plix nawh, phan pex yuh nan khaox an tak deeh nie plix son pex, Aux mawh Siyiex pa mawh Simiang Siyiex pex.²⁶ Pex ang pon ti ih ceu pa koe tau mai nham, pex ang pon ti gau tix ka ceu pa ang mawh ang meh, pex ang pon ti tawx sibawk chawk jhai.²⁷ Pex ang pon ti khlaohauk kaing vungviang kaing tix, pex ang pon ti khlaohauk bheup tix.²⁸ Pex ang pon ti pat ka nex hak tix son pui pa yum, pex ang pon ti phruat rawm tiem piang tix, Aux mawh Simiang Siyiex.²⁹ Paw kieh kawn sibun maix laux jhawm, son ang nawh lih ti mawh bun coh kaux, phan yuh nan pui haktiex khawmuik tak lih ti mawh pa ludvao mai pa caox caig khankix tak lih naog piang haktiex.³⁰ Pex tak priex singaix tuah Aux mai yungyi ka dee pa singax singeh Aux, Aux mawh Simiang Siyiex.³¹ Paw hu sawg ka pui chix yuh phi mai pui chix yuh simeed pa dex mai phicaox mai paw doh kieh tokaux tix seeing brai ka ceu an, Aux mawh Simiang Siyiex pa mawh Siyiex pex.³² Maix tak kaoh cung sivoe ngai pui kuad paing hauk kaing mai yungyi ka kuad riex ju mai koe krax lhat graung ka Siyiex maix, Aux mawh Simiang Siyiex.³³ Phan nyosinie hoek ti peung mai pex ka daux haktiex pex, pex ang nieb pon ti yuh krax pa ang khaw ang jiet ka nawh,³⁴ nyosinie pa ot sinax pex, tak kieh nawh awm pui pa keh daux sinax pex, pex tak moh nawh awm moh pex ka tokaux tix, grawh grawng nawh, pex hoik sax mawh nyosinie ka daux meung Ejiptux, Aux mawh Siyiex pa mawh Simiang Siyiex pex.³⁵ Pex tak ang pon ti yuh pa ang rahsee ka daux krax prawng ca ka pa tiag pex plak lang, ka pa ciang pex ngai jiang mai ka pa tong pex ka kraung tong pa koe pex khankix kawx, mawh awm an.³⁶ Pex tak koe ngai jiang pa rahsee, kla jiang pa rahsee, phliex tong pa rahsee mai jiang pa rahsee, Aux mawh Siyiex pa mawh Simiang Siyiex pex, pa hoik viex pex lih khaing meung

19:15 Lih 23:6-8, Pi 16:19. 19:18 Mat 5:43, 19:19, 22:39, Mak 12:31, Luk 10:27, Ro 13:9, Ka 5:14, Ya 2:8. 19:19 Pi 22:9-11. 19:26 Yam 9:4, Krub 7:26-27, 17:10-14, Pi 12:16, 23, 15:23.

19:26 Pi 18:10. 19:27-28 Krub 21:5, Pi 14:1. 19:29 Pi 23:17. 19:30 Krub 26:2. 19:31 Pi 18:11. 19:33-34 Lih 22:21, Pi 24:17-18; 27:19. 19:35-36 Pi 25:13.

Ejiptux. ³⁷Mawh kheu nan, pex tak priex ti hawt gumlox been Aux khawmuik mai lox tat jhawm prawng Aux khawmuik, Aux mawh Simiang Siyiex heue.”

20 *Pui Pa Ang Nghiet Lox Been*

Simiang Siyiex ah nin ka Mose, ²⁴“Krai ah nin ka ceu pui Isarelaux khankix, canceu pui Isarelaux angah, nyosinie pa hoek ot sinax ceu pui Isarelaux angah, pui pa hu tawx doeh ru tix ka siyiex Molawk angah, nawh tak pon krax yum tete, pui haktiex khankix tak dheem nawh ka simaox. ³ Aux tak veeh pakngai Tix khaing nawh mai teei ti tik nawh khaing daux ceu pui nawh, kheu hoik tawx nawh doeh ru tix tixblauh ka siyiex Molawk kheu yuh nawh dee pa singax singeh Aux seeing brai mai kieh ceukaux pa singax singeh Aux, mawh pa nunai giexgoing. ⁴ Phan pui haktiex khankix mox ngai tix ka pui pa hu tawx doeh ru tix ka siyiex Molawk mai phan kix ang pah ka nawh, ⁵ Aux tak veeh pakngai Tix khaing pui an mai kawn nyiexma nawh mai Aux tak teei ti tik nawh khaing ceu pui nawh, khawm can pui pa yuh pa ludvao, tau mai siyiex Molawk. ⁶ Pui pa hu sawg hu peung ka pui pa chix yuh phi yuh simeed pa dex mai phicaox, Aux tak veeh pakngai tix khaing kaw an mai teei ti tik nawh khaing ceu pui nawh. ⁷ Mawh kheu nan, kieh tokaux pex singax mai mawh pa singax singeh, grawhgrawng nawh Aux mawh Siyiex pa mawh Simiang Siyiex pex. ⁸ Pex tak priex ti hawt gumlox been Aux mai hawt ti yuh, Aux mawh Simiang Siyiex pex, pa kieh pex singax singeh. ⁹ Can pui pa jhaxlawg ka keeing tix angah, miex tix angah, tak kieh nawh yum tete, mawh kheu jhaxlawg nawh ka miex keeing tix, nham phimap nawh tak hoek piang nawh. ¹⁰ Pui pa ludvao ka moeng pui tang kaux mai moeng plawg tix, khawm simex pa lud mai sibun pa koe krax lud an tak yum tete, ¹¹ pui mawx pa it tau mai moeng keeing tix, mawh pui plih tokaux kahkaong pa kaig tua keeing tix, kiex khawm ra tak yum tete, nham phimap kiex tak hoek piang kiex. ¹² Phan pui tix kaux it mai mun tix, kiex khawm ra tak yum tete,

mawh kheu jao hoik lud kiex khawm ra ka daux pa seeing brai, nham phimap kiex tak hoek piang kiex. ¹³ Phan simex it mai paox simex tix, awm it mai bun, kiex khawm ra hoik yuh ceu pa seeing brai, kiex tak yum khawm ra, nham phimap kiex tak hoek piang kiex. ¹⁴ Phan simex tix kaux teei ti moeng ka sibun pa mawh miex mai kawn, an mawh pa caox caig, tak gleeing ti tik kix khawm loe kaux ka ngu, son ang pa caox caig lai koe ka daux sinax pex. ¹⁵ Phan simex tix kaux ludvao mai tobrie, nawh tak yum tete mai pex tak pah tobrie an. ¹⁶ Phan bun tix kaux dexdawd mai tobrie ceu pa tix angah mai ludvao mai tobrie an, maix tak pah bun khawm tobrie an, kiex tak yum tete, nham phimap kiex tak hoek piang kiex. ¹⁷ Phan simex tix kaux teei ti moeng nan tix, pa mawh kawn sibun keeing nawh angah, kawn sibun miex nawh angah mai plih tokaux kahkaong krax pa kaig tua nawh mai phan bun an yaox ka krax kaig tua simex, an mawh ceu pa kaig tua mai tak teei ti tik kiex khaing sivoe ngai ceu pui kix, kheu hoik pon nawh ti plih tokaux kahkaong pa kaig tua nawh, kiex tak kham geu phimap tix. ¹⁸ Phan simex tix kaux hu it mai bun yam kawn koe nham mee bun nawh mai plih tokaux kahkaong krax kaig tua nawh mai phan nawh hoik yaox pa lih nham nawh mai phan bun an ang kheem ka nham tix, kiex khawm ra tak mawh pa teei ti tik khaing ceu pui kix. ¹⁹ Pex tak ang pon ti plih tokaux kahkaong pa kaig tua pux o miex tix mai nan keeing tix, grawhgrawng nawh an mawh pa plih tokaux kahkaong mai paox nyiexma tix, kiex tak yaox ti kham geu phimap tix. ²⁰ Phan simex tix kaux it tau mai moeng keeing iak tix, nawh hoik mawh pa plih tokaux kahkaong pa kaig tua keeing iak tix, kiex tak kham geu phimap tix mai kiex tak mawh pa ang lai chix koe kawn. ²¹ Phan simex tix kaux teei ti moeng ka moeng puxaik tix, an mawh pa seeing brai, nawh hoik plih tokaux kahkaong pa kaigtua puxaik tix, kiex tak mawh pa ang lai chix koe kawn. ²² Mawh kheu nan, pex tak hawt gumlox been Aux mai lox tat jhawm prawng Aux khankix mai hawt ti yuh

20:9 Lih 21:17, Mat 15:4, Mak 7:10. 20:14 Krub 18:17, Pi 27:23. 20:15-16 Lih 22:19, Krub 18:23, Pi 27:21. 20:17 Krub 18:9, Pi 27:22.

20:18 Krub 18:19. 20:19-20 Krub 18:12-14. 20:21 Krub 18:16.

an kix son ang haktiex dee pa sang viex Aux pex ot, hao ti tik ka pex.²³Pex tak ang pon ti hawt grawng lawng khaix grawng been pui an khankix, pa sang grheu Aux ti tik sivoex pex, grawh grawng nawh, kix hoik lud ka grawng ceu inkix khawmuik, mawh kheu nan, Aux koeng ka kix.²⁴ Viang mawh nan, Aux hoik ah nin ka pex, pex tak pon ti cie haktiex kix mai Aux tak sang tawx mawh sinngao sonsang pon pex ticie haktiex deelih rawm teeih mai rawm hia, Aux mawh Siyiex pa mawh Simiang Siyiex pex, pa hoik tang goih pex khaing pui tang ceu khankix.²⁵Mawh kheu nan, pex tak tang goih tobrie pa singax mai tobrie pa ang singax sidawng daux sinax pex, pex tak ang pon ti kieh tokaux tix seeing brai, ka tobrie khankix mai sim sai mai canceu pa im ju kuceu, pa chix mu chix hu piang tiex mai pa hoik tang goih Aux ti deuh khaing pex, awm ceu pa ang singax khankix.²⁶ Pex tak mawh pa singax singeh ka son Aux, mawh kheu Aux mawh Siyiex pa singax singeh mai Aux hoik tang goih pex khaing pui tang ceu, sonsang mawh pex cie Aux.²⁷ Simex angah, sibun angah, pa mawh pui pa yuh phi pa chix simeed khankix tak yum tete, pui tak dheem kix yum ka simaox, nham phimap kix tak hoek ka piang kix heue.”

21 *Been Singax Cao Giex Kaing Li*

Simiang Siyiex ah nin ka Mose, “Krai ka cao giex kaing li pa mawh kawm simex Arun ah nin, cao giex kaing li tak ang pon ti kieh tokaux ti seeing brai ka tokaux pui yum daux sinax pui ceu tix.²Lheu khaing paox nyiex pa dex mai nawh khankix, pa mawh miex keeing khawm kawm simex kawm sibun mai puxaik nawh angah,³pux o bunkrih pa ang nyang koe mex, nawh tak pon ti kieh tokaux ti seeing brai kah.⁴Nawh tak ang pon kieh tokaux tix seeing brai ka an khankix, kheu mawh nawh cao kaing pa ting tix kaux daux sinax ceu pui nawh khankix.⁵Kix tak ang pon ti khlaohauk kaing tix pak, kix tak ang pon ti khlaohauk bheup tix mai ang pon ti pattokaux tix ka vaigka gawn.⁶Kix tak mawh

pa singax singeh son Siyiex kix mai ang pon ti kieh ceukaux Siyiex tix mawh pa nunai giexgoing, grawh grawng nawh kix mawh pui pa tan krax tan pa yuh tix ka ngu son Simiang Siyiex mai pa tan blah ka Siyiex, mawh kheu nan, kix tak mawh pa singax singeh.⁷Kix tak ang pon ti teeibun coh kaux, bun pa hoik seeing brai mai bun pa hoik tik mex nawh ti kieh mawh moeng tix, grawh grawng nawh cao giex kaing li mawh pa singax singeh son Siyiex.⁸Mawh kheu nan, pex tak yuh nawh mawh pa singax singeh, kheu mawh pa tan ti tawx blah ka Siyiex pex, nawh tak mawh pa singax singeh ka son pex, kheu mawh Aux Simiang Siyiex pa singax singeh mai pa kieh pex singax singeh.⁹Phan kawm sibun cao giex kaing li yuh bun coh kaux mai kieh tokaux ti seeing brai, nawh mawh pa kieh keeing tix seeing brai, tak gleeing ti tik nawh ka ngu.¹⁰Nawh mawh cao giex kaing li pa ting lhaong ka sinax puxaik tix, pa hoik groi kix bee piang kaing mai mawh pui pa appong tix ceep kraung pa singax singeh, nawh tak ang pon ti bhang kaing tix mai riah ti tik kraung ceep tix khankix.¹¹Nawh tak ang pon ti hu dex tokaux yum tix ceu kawm mai nawh ang pon ti kieh tokaux tix seeing brai son miex keeing tix.¹²Nawh tak ang pon ti hu plak praix khaing dee pa singax singeh mai ang pon ti nunai ka dee pa singax singeh Siyiex tix, grawh grawng nawh bee groi pa appong Siyiex koe piang kaing nawh, Aux mawh Simiang Siyiex.¹³Nawh tak teei ti moeng ka bunkrih.¹⁴Miexmai angah, bun hoik tik mex nawh angah, bun coh kaux pa hoik seeing brai angah, ceu bun inkix nawh tak ang pon ti teeibun mawh moeng tix mai nawh tak pon ti teeibun mawh moeng tix tix kaux khaing daux ceu pui tix.¹⁵Nawh tak ang pon ti ah pa ang khaw ang jiet ka kawm praix tix ka sinax pui ceu tix, grawh grawng nawh Aux mawh Simiang Siyiex pa kieh nawh singax singeh.”¹⁶Simiang Siyiex ah nin ka Mose,¹⁷“Krai ka Arun ah nin, ka daux doeh ru maix ku ju, pa koe dee mat dee ne, tak ang pon ti hoek dex, sonsang tan blah ka Siyiex.¹⁸Grawh grawng nawh can pui pa hoik koe dee mat dee ne, pui pa dug ngai

angah, pui pa laux caong anghah, pui laux meeh anghah, pui kak giien taix giien caong anghah ¹⁹ mai pui pot taix caong anghah, ²⁰ pui kawm nyoi anghah, pui kalu anghah, pui pa koe jhawm saux ngai anghah, pui pa saux ngoi saux dao anghah, pui pa laux tom kla anghah, nawh tak ang pon ti hoek dee dex. ²¹ Pui daux doeh ru cao giex kaing li Arun, pa koe dee mat dee ne, tak ang pon ti hoek dex sonsang tan krax tan pa gleeing ka ngu son Simiang Siyiex, mawh kheu hoik koe krax lud nawh, nawh tak ang pon ti hoek dex sonsang tan nawh blah Siyiex. ²² Nawh tak pon ti ih blah Siyiex, pa singax singeh khawm pa kied singax singeh. ²³ Nawh tak ang pon ti hu dex man tie mai ang pon ti hoek dex khu dee tan, mawh kheu hoik koe dee mat dee ne nawh, Aux lhat nawh yuh pa nunai ka dee pa singax singeh Aux, mawh kheu Aux mawh Simiang Siyiex pa kieh kix singax singeh. ²⁴ Mose krai inkix ka Arun khawm kawm simex nawh khankix mai ka ceu pui Isarelaux khankix heue."

22 Simiang Siyiex ah nin ka Mose, ² "Krai ka Arun mai kawm simex nawh khankix, sonsang chix tang goih kix tokaux ti khaing ceu pa singax singeh ceu pui Isarelaux khankix mai sonang kix pon nunai ka min ceukaux Aux, ka daux ceu ankix, son pa yuh kix mawh pa singax singeh son Aux, Aux mawh Simiang Siyiex. ³ Krai ka kix ah nin, ka daux doeh ru pex khankix ku ju, can pui pa hu dex ceu pa hoik goih ceu pui Isarelaux mawh pa singax singeh son Simiang Siyiex mai yam koe pa ang singax piang nawh, tak teei ti tik pui an khaing sivoie ngai Aux, Aux mawh Simiang Siyiex. ⁴ Ka daux doeh ru Arun pui pa koe jhawm saux sipawg, jhawm saux yia tak ang pon ti ih krax tan pa singax singeh, tom ang nawh nyang pon tix singax mai can pui pa hu krox hu teeh ka tokaux yum pa ang singax anghah mai pui pa hoik lih rawm ngang anghah, ⁵ pa hu krox hu teeh ka tobrie pa chix mu chix hu pa sang kieh nawh mawh pa ang singax anghah mai hu krox teeh pui pa sang kieh nawh ang singax anghah, ceu pa ang nawh singax koe yuh ka mawx kawx, ⁶ Pui pa hu

krox hu teeh ka ceu ankix, tak mawh pa ang singax tom hoek plakbo, nawh tak ang pon ti ih krax tan pa singax singeh khankix, tom ang nawh nyang bax heem tix ka rawm. ⁷ Nawh tak mawh pa singax yam hoik klip singaix, khaix an nawh tak pon ti ih krax tan pa singax singeh, grawh grawng nawh an mawh pa ih nawh. ⁸ Nawh tak ang pon ti ih nex pa tang yum, nex pa hoik kiied tobrie bliex khankix, sonsang kieh nawh tokaux ti seeingbraikaankix, Aux mawh Simiang Siyiex. ⁹ Mawh kheu nan kix tak priex ti hawt gumlox beenli Aux, phan ang mawh nan, kix tak yaox ti kham geu phimap tix mai yum, Aux mawh Simiang Siyiex pa kieh pex singax singeh. ¹⁰ Pui tang ceu tang cad tak ang pon ti ih krax tan pa singax singeh, pui pa hoek ti peung tivud ticu tau mai cao giex kaing li anghah, siliex pa cang anghah, tak ang pon ti ih ceu pa singax singeh. ¹¹ Viang mawh nan, phan cao giex kaing li liag pui ka mau, nawh tak pon ti ih an mai pui pa keh ka daux nyiex ma nawh, tak pon ti ih pa ih nawh. ¹² Phan kawm sibun cao giex kaing li mex ka pui tang ceu, kawm sibun an tak ang pon ti ih ka krax tan pa singax singeh. ¹³ Viang mawh nan, phan kawm sibun cao giex kaing li an mawh miexmai anghah, bun pa hoik tik mex kah anghah mai phan nawh ang nyang koe kawm mai phan nawh deeh ing ka nyiex keeing tix, awm yam mawh nawh kawm nyawm, bun an tak pon ti ih pa ih keeing nawh, viang mawh nan, pui tang ceu tak ang pon ti ih. ¹⁴ Phan pui kox ih krax tan pa singax singeh mai ang tix tawng, khaix an nawh tak deeh plud tix tan krax tan pa singax singeh ka cao giex kaing li phuan son tix son piang an. ¹⁵ Cao giex kaing li tak ang pon ti nunai, ka krax tan pa singax singeh ceu pui Isarelaux khankix, pa tan kix ti tawx ka Simiang Siyiex ¹⁶ mai tak ang kieh kix kham geu ka phimap pa hoik lud kix, kheu hoik pon kix ti ih ka krax tan pa singax singeh khankix, grawh grawng nawh, Aux mawh Simiang Siyiex pa kieh kix singax singeh heue."

Krax Tan Pa Rieb Mai Pa Ang Rieb

¹⁷ Simiang Siyiex ah nin ka Mose, ¹⁸ "Krai ka Arun mai kawm simex nawh khankix mai ka

ceu pui Isarelaux khawmuik ah nin, can pui pa kaoh khaing daux nyiexma ceu pui Isarelaux khankix angah, nyosinie pa ot tau mai kix angah, pa tan krax tan pa appong son lox kham sijax angah, son pa tan awm pa koe rhawm tix, sonsang mawh krax tan pa gleeing ka Simiang Siyiex,¹⁹ nawh tak tan ti tawx mawie mhaing, yung mhaing, pex mhaing pa ang koe dee mat dee ne.²⁰ Viang mawh nan, can pa hoik koe dee mat dee ne, maix tak ang pon ti tan, grawh grawng nawh tak ang pon ti rieb tang maix.²¹ Can pui pa tan krax pa appong son krax tan pa nhim ka Simiang Siyiex, sonsang grumnaog lox kham sijax nawh, krax tan awm pa koe rhawm tix pa mawh mawie, yung, sonsang mawh pa pon ti rieb kah an tak mawh pa grumnaog mai tak kieh nawh mawh pa ang koe dee mat dee ne.²² Pa dug ngai angah, pa pot si-ang angah, pa laux maung angah, pa uah angah, pa ngoi mai pa dao angah, tak ang pon ti tan ka Simiang Siyiex, tak ang pon ti yuh krax tan pa gleeing piang khu krub dee tan, son Simiang Siyiex.²³ Maix tak pon ti tan mawie mhaing angah, kawng yung iak angah, pa lheu koe pakpeung tokaux mai pa cudcha pakpeung tokaux khankix, son krax tan awm pa koe rhawm tix, viang mawh nan, phan an mawh krax tan son lox kham sijax, tak mawh pa ang pon ti rieb.²⁴ Maix tak ang pon ti tan pa hoik laux kla, pa hoik phawng, pa hoik pliang mai pa hoik sieh tix khankix ka Simiang Siyiex. Maix tak ang pon ti yuh krax tan ceu an khankix ka daux haktiex pex.²⁵ Maix tak ang pon rieb ti tan ceu in khankix tix ceu kawx, khaing daux tawm taix pui tang ceu, awm pa mawh blah pa tan maix son Siyiex tix, mawh kheu koe krax pa lauxleeing mai koe dee mat dee ne, an khankix tak mawh pa ang pon ti rieb son maix.”²⁶ Simiang Siyiex ah nin ka Mose,²⁷ “Yam keh kawng mawie tix mu angah, kawng yung tix mu angah mai kawng pex tix mu angah, tak yaox ti ot tau mai miex tix aliah ngaix, jah khaix daix singaix hu

22:20 Pi 17:1. 23:3 Lih 20:8-10, 23:12, 31:15, 34:21, 35:2, Pi 5:12-14. 23:5 Lih 12:1-13; Pi 16:1-2.

sivoe ngai, an tak rieb ti teei son krax tan pa gleeing, son Simiang Siyiex.²⁸ Viang mawh mawie shiang angah, kawng yung shiang angah, paw doh pah miex mai kawng daux tix ngaix ngie.²⁹ Yam tan maix pa appong krax pa yaogyaw buanson ka Simiang Siyiex, kieh mawh krax tan pa pon rieb ka son maix.³⁰ An tak mawh pa ih ka daux singaix an, maix tak ang pon ti deuh an khankix tom hoek plak ponngawb, Aux mawh Simiang Siyiex.³¹ Pex tak priex ti hawt gumlox pingnyap Aux khankix mai hawt ti yuh awm ankix, Aux mawh Simiang Siyiex.³² Pex tak ang pon ti nunai ka ceukaux pa singax singeh Aux, viang mawh nan, Aux tak mawh pa singax singeh ka daux sinax ceu pui Isarelaux khankix, Aux mawh Simiang Siyiex pa kieh pex singax singeh,³³ sonsang mawh Aux Siyiex pex Aux hoik viex pex lih khaing Ejiptux, Aux mawh Simiang Siyiex heue.”

Grawng Pawie Simiang Siyiex

23 (Si 28:16; 29:40)
 Simiang Siyiex kraih ah nin ka Mose,² “Kraih ka pui Isarelaux khankix, pawie pa sang yuh pex pa mawh pawie pa singax singeh cie Simiang Siyiex mawh inkix heue.

Grawng Singaix Tuah

³ Pex tak yuh kaing ka daux liah ngaix, viang mawh nan daux aliah ngaix mawh singaix tuah singaix lauxlee pex tix mai singaix pawie pa singax singeh, pex tak ang pon ti yuh kaing tix ceu kawx, an mawh singaix tuah Simiang Siyiex ka can dee ot pex kudah.

Pawie Pasakha

⁴ In khankix mawh pawie Simiang Siyiex, pawie pa yuh pex daux pa singax singeh mai pa sang kraih pao pex ti yuh yam hoik hoek bawgyam.⁵ Ka daux khix jah kao pon ngaix plak bo, an mawh singaix pawie Pasakha Simiang Siyiex.⁶ Ka daux khix an kao phuan ngaix mawh singaix pawie blah pa ang sau susaix son Simiang Siyiex, pex tak ih blah pa ang sau susaix aliah ngaix.⁷ Ka daux singaix jah pex tak yuh pawie pa singax singeh tau, pex tak ang pon ti yuh kaing pa dex mai haktiex tix ceu kawx.⁸ Pex tak tan krax tan pa gleeing son Simiang Siyiex glang daux aliah ngaix an, singaix aliah tak mawh singaix

pawie pa singax singeh, pex tak ang pon ti yuh kaing pa dex mai haktiex tix ceu kawx.”

Pawie Plix Pa Liang

⁹Simiang Siyiex krai ah nin ka Mose, ¹⁰“Krai ka pui Isarela x khankix, yam hoek pex ka dau x haktiex pa tawx Aux ka pex, phan pex vawg nghox khankix, pex tak viex lhiem nghox pa liang pex ti vawg hoek ka cao giex kaing li, ¹¹sonsang mawh pa rieb ti teei son tang pex, khaix hoik luan khaing dau x singaix tuah, cao giex kaing li tak yangyeuh lhiem nghox an sivo e Simiang Siyiex. ¹²Pex tak pon ti tawx kaw n yung mhaing pa hoik naog num pa loig tix mu, son krax tan pa gleeing son Simiang Siyiex ka singaix an, yam yangyeuh pex ka lhiem nghox. ¹³Krax tan ceu pa ih pa dex dawd mai totan an tak mawh phawng nghox ca pa hoik klao ti tau mai bee kao son ra son khaing tix epha pa mawh krax tan pa gleeing ka Simiang Siyiex, son pa sio e bhawng, krax tan pa nyaux tak mawh rawm plix siiet pon son tix son khaing tix hing loe awga. ¹⁴Pex tak ang pon ti ih blah, pa yuh ka ga ox diag mai plix nghox plix koi pa im khankix tom hoek ka dau x singaix ang pex nyang viex ti tan sivo e Siyiex pex, an tak mawh been leeing ju dau x doeh ru pex can dee ot pex kudah.

Pawie Tix Vang Tuah

¹⁵ Khaix hoik luan singaix tuah dau x singaix pasax, khaix hoik viex pex lhiem nghox son krax tan pa yangyeuh, pex tak simin tom grumnaog aliah vang tuah, ¹⁶ khaix hoik luan ngaix tuah jah pasax simin kieh naog tix phuan singaix, khaix an pex tak tan krax tan ceu pa ih ka Simiang Siyiex. ¹⁷Pex tak viex blah pa yangyeuh ra lon khaing dau x nyiex ma tix, kao son ra son khaing tix epha ra Awmie, ka phawng nghox ca im pa hoik yuh sin tau mai susaix, pa mawh plix pa liang tix plix khankix ka son Simiang Siyiex. ¹⁸ Pex tak tan kaw n yung iak pa loig pa naog num aliah mu tau mai blah mai kaw n mawie mhaing tix mu mai kaw n yung ra mu, an tak mawh krax tan pa gleeing son Simiang Siyiex tau mai krax tan ceu pa ih mai krax

23:22 Krub 19:9-10, Pi 24:19-22. 23:26-32 Krub 16:29-34.

tan pa nyaux mai krax tan pa gleeing ka ngu pa sio e bhawng ka Simiang Siyiex. ¹⁹ Pex tak tan kaw n pex mhaing tix mu son krax tan pa pluatploi phimap mai kaw n yung pa hoik naog num ra mu son pa sang yuh krax tan pa nhim. ²⁰ Cao giex kaing li tak yangyeuh an tau mai blah plix khaox pa liang ti pon son krax tan pa yangyeuh sivo e Simiang Siyiex, tau mai kaw n yung iak an ra mu, an khankix tak mawh pa singax singeh son cao giex kaing li ka Simiang Siyiex. ²¹ Ka dau x tix ngaix an pex tak krai pao mawh pawie pa singax singeh ka son pex, pex tak ang pon ti yuh kaing pa dex mai haktiex tix ceu kawx, an tak mawh been leeing ju ka can dee ot pex dau x doeh ru pex. ²² Yam vawg pex nghox ka dau x haktiex tix, pex tak ang pon ti vawg ka can pa koe ka daog kaung pex khawmuik, pex tak ang pon ti khrawm nghox pa cod pa roik pa kaw n deuk khaix tix, pex tak prah an khankix son pui hot sia mai nyosinie, Aux mawh Simiang Siyiex pa mawh Siyiex pex.”

Grawng Pawie Teettawng

²³ Simiang Siyiex krai ah nin ka Mose, ²⁴ “Krai ka pui Isarela x khankix ka dau x khix aliah, haok khix tix ngaix, pex tak lauxlee tix mai tuah klaung, pex tak phlu teettawng sonsang dohkeud ka mawh pawie pa singax singeh. ²⁵ Pex tak ang pon ti yuh kaing pa dex mai haktiex, mai pex tak yuh krax tan pa gleeing ka ngu ka Simiang Siyiex.”

Pawie Pluatploi Phimap

²⁶ Simiang Siyiex krai ah nin ka Mose, ²⁷ “Ka dau x khix aliah haok khix kao ngaix, mawh singaix yuh pa khioxkhaw pa pluatploi phimap, an tak mawh singaix pawie pa singax singeh son pex, pex tak thiang ka tokau x tix mai yuh krax tan pa gleeing ka ngu ka Simiang Siyiex. ²⁸ Dau x singaix an pex tak ang pon ti yuh kaing tix ceu kawx, mawh kheu an mawh singaix yuh pex krax khioxkhaw mai krax pa pluatploi phimap son tix sivo e Simiang Siyiex. ²⁹ Mawh kheu pui mawx angah, pa ang pon thiang tokau x tix singaix an, tak tik nawh khaing dau x ceu pui nawh. ³⁰ Pui mawx angah pa yuh kaing tix ceuceu ka dau x singaix an, Aux tak yuh lauxleeing, khaing dau x sinax ceu pui nawh. ³¹ Pex tak ang pon ti yuh kaing tix ceu kawx, an tak mawh been leeing ju tix

ju hoik tix ju, can dee ot pex daux doeh ru pex. ³²Singaix an tak mawh singaix tuah, ot yiienyawg tix mai pex tak thiang tokaux tix jah plakbo singaix dim tom hoek plakbo pasax, pex tak priex ti hawt mai tuah mhawm mhawm.”

Pawie Nyiex Gox Bang

³³Simiang Siyiex krai ah nin ka Mose, ³⁴“Krai ka pui Isarelaux khankix, ka daux khix aliah kao phuan ngaix, daux aliah ngaix an tak mawh singaix pa yuh pex pawie nyiex gox bang son Simiang Siyiex. ³⁵Ka daux singaix jah an tak mawh singaix pawie pa singax singeh, pex tak ang pon ti yuh kaing pa dex mai haktiex. ³⁶Pex tak yuh krax tan pa gleeing ka ngu ka Simiang Siyiex aliah ngaix, ka daux singaix daix pex tak yuh pawie pa singax singeh mai pex tak yuh krax tan pa gleeing ka ngu ka Simiang Siyiex, an mawh pawie pa blon ting, pex tak ang pon ti yuh kaing pa dex mai haktiex. ³⁷In mawh pawie Simiang Siyiex pa hoik tat ti deuh, pawie pa singax singeh pa sang krai pao pex bawgyam sonsang yuh pex krax tan pa gleeing ka ngu ka Simiang Siyiex, pa mawh krax tan pa gleeing mai krax tan ceu pa ih mai krax tan pa nyaux kuceu, daux ngaix mawx ngaix an, ³⁸lheu khaing singaix tuah Simiang Siyiex, pex tak yaox ti yuh krax tan pa appong, krax tan lox kham sijax mai krax tan awm pa koe rhawm pex tix sang tan khawmuik, pex tak tan an khankix ka Simiang Siyiex. ³⁹Khaix hoik khrawm pex plix nghox plix koi khaing daux haktiex, jah ka daux khix aliah kao phuan ngaix, pex tak yuh pawie Simiang Siyiex aliah ngaix, ngaix tix mai ngaix daix tak mawh ngaix tuah sonsang lauxlee pex tix heue. ⁴⁰Ka daux ngaix tix maix tak viex plix khaox pa mhawm, kak khaox jhie yaong, kak khaox pa mhawm lhax khankix mai lhax kak khaox siglai khankix, pex tak yuh krax gauxrhawm sivoie Simiang Siyiex pa mawh Siyiex pex aliah ngaix. ⁴¹Pex tak yuh pawie an ku num son Simiang Siyiex aliah ngaix, an tak mawh been leeingju ka daux doeh

23:33-36 Pi 16:13-15. 23:39-43 Lih 23:16, 34:22. 24:5-6 Lih 25:30.

ru pex, pex tak yuh pawie an ka daux khix aliah. ⁴²Pex tak yaox ti ot ka daux nyiex gox lhax khaox aliah ngaix, can pui pa keh khaing ceu pui Isarelaux khankix tak yaox ti ot ka daux nyiex gox lhax khaox, ⁴³sonsang tawng doeh ru pex mawh Aux pa kieh pui Isarelaux khankix ot ka daux nyiex gox lhax khaox yam viex Aux kix lih khaing meung Ejiptux, Aux mawh Simiang Siyiex pa mawh Siyiex pex.” ⁴⁴Mawh kheu nan, Mose krai pao grawng pawie Simiang Siyiex ka ceu pui Isarelaux khankix heue.

Jawk Ngu Khri Nyiex Gox Buan Man

24 Simiang Siyiex krai ah nin ka Mose, ²“Tawm lox ka pui Isarelaux khankix, sonsang viex kix bee singax singeh pa hoik klah ti khaing plix Sanlun son kaww ngu hoek ka maix sonsang tok maix kaww ngu rieng ang jud ang jai. ³Ka plak praix man tie, dee koe teug buan sijax mukheu ka daux nyiex gox buan man bang kum. Arun tak mawh cao pa bung kaing an, jah ka plak bo, tom hoek ka plak ponngawb sivoie Simiang Siyiex ang jud ang jai, an tak mawh been leeingju ka daux doeh ru pex. ⁴Nawh tak mawh pa khrierien ka kaww ngu pa koe piang jawk ten khri ceu pa singax singeh, sivoie Simiang Siyiex ang jud ang jai heue.

Blauh Tan Daux Nyiex Gox Buan Man

⁵“Maix tak teei phawng gaox nghox ca im ceu pa mhawm mai yuh blauh kao ra lon, blauh ku lon tak mawh pa koe phawng nghox ca kao son ra son khaing tix epha ra Awmie. ⁶Maix tak deuh blauh an piang pheeh khri pa singax singeh ra pum, tix pum liah lon sivoie Simiang Siyiex. ⁷Maix tak sau lawpan pa singax singeh piang pum blauh an khawm ra pum, sonsang mawh an nyum krax tan pa dohkeud son krax tan pa gleeing ka ngu son Simiang Siyiex. ⁸Daux singaix tuah ku tuah, Arun tak deuh pan blauh an sivoie Simiang Siyiex ang jud ang jai tang kawn praix Isarelaux khankix, awm gumlox sijax mukheu leeingju. ⁹An tak mawh son Arun mai kawn simex nawh khankix, kix tak ih an dee pa singax singeh, mawh kheu mawh an krax tan pa kied

singax singeh pa gleeing ka ngu ka Simiang Siyiex, pa mawh been leeingju.

Krax Ciyang Kheu Nunai Ka Siyiex

¹⁰ Kawn simex bun ceu pui IsarelaX pa keeing nawh mawh pui Ejiptux, lih hu sinax pui IsarelaX, yam an kawn simex bun ceu pui IsarelaX mai pui IsarelaX tix kaux simah paox tix dauX nyiex bang. ¹¹ Mawh kheu kawn simex pa keh khaing bun ceu pui IsarelaX an, hoik nunai ceukaux Simiang Siyiex mai hoik jhax lawg kah, tom viex nawh hoek ka Mose. Ceukaux miex nawh mawh Shelawmix kawn bun Dibarix ceu pui Dan. ¹² Kix gang ti deuh nawh tom sidah ang kix nyang tawng ka alo Simiang Siyiex mawh pa yuh ka mawx ka kaw an.” ¹³ Khaix an, Simiang Siyiex kraih ah nin ka Mose, ¹⁴ “Tei puipa jhax lawg an lih ka plak praix nyiex bang, khaix an kieh pui pa hoik mhong lox pa jhax lawg nawh khawmuik deuh taix ti piang kaing nawh mai kieh cub pui hun dheem nawh ka simaox. ¹⁵ Kraih ah nin ka pui IsarelaX khankix, can pui pa jhax lawg ka Siyiex tix, tak yaox ti kham geu phimap tix. ¹⁶ Can pui pa lud mai nunai ceukaux Simiang Siyiex, tak yaox ti yum tete, cub pui hun tak dheem nawh ka simaox, dauX pui ceu pex angah, dauX pui tang ceu angah, phan lud mai nunai ceukaux Simiang Siyiex tak yaox ti yum tete. ¹⁷ Can pui pa pah ka pui yum tix kaux, tak yaox ti yum tete. ¹⁸ Can pui pa pah ka tobrie tak yaox ti deeh plud tobrie son tobrie mai plud ju son ju. ¹⁹ Phan pui tix kaux yuh krax saux mat ka paox plawg tix, tak deeh yuh awm an ka nawh, ²⁰ pot si-ang son pot si-ang, ngai son ngai, rhang son rhang, awm hoik yuh nawh krax saux mat ka pui tix kaux, tak deeh yuh awm an ka nawh. ²¹ Pui pa pah tobrie, nawh tak deeh yaox ti plud tobrie, pui pa pah pui yum, tak yaox ti yum tete. ²² Pex tak yaox ti koe been lox tat jhawm prawng tix ceu khaing son dauX pui ceu pex angah, pui tang ceu angah, mawh kheu Aux mawh Simiang Siyiex pex.” ²³ Khaix hoik kraih Mose ceu an ka pui IsarelaX khankix mai kix viex kaw pa hoik jhax lawg an lih ka plak praix nyiex bang mai dheem

24:22 Si 15:16. 25:1-7 Lih 23:10-11.

nawh yum ka simaox. Mawh kheu nan, pui IsarelaX khankix yuh awm gumlox pa hoik tawm Simiang Siyiex ka Mose heue.

25 ***Grawng Ngaix Tuah Aliah Num Tix Num***
 Simiang Siyiex ah nin ka Mose piang gawng Sina, ² “Kraih ah nin ka pui IsarelaX mai yam hoek pex ka haktiex pa tawx Aux ka pex, kieh haktiex an priexrien ngaix tuah son Simiang Siyiex. ³ Pex tak sum simie ka dauX kaung been liah num mai pex tak cox pawt nhu plix siiet dauX sipeem tix dauX liah num mai khrawm plix khankix. ⁴ Ka dauX num aliah an, tak mawh num pa tuah mai kieh haktiex lauxlee tix mai mawh ngaix tuah son Simiang Siyiex, maix ang pon sum simie ka dauX kaung tix mai ang pon ti cox pawt ka nhu plix siiet ka dauX sipeem tix. ⁵ Nghox pa tang lih kuah dauX kaung pex kawx, ang pon ti vawg, pex tak ang pon pieh pon khrawm ka plix siiet pa ang pex cox pawt khaing dauX sipeem plix siiet tix, mawh kheu mawh num lauxlee son haktiex. ⁶ Ceu pa lih khaing num pa tuah haktiex an, tak mawh pa ih son maix, son siliex simex, siliex sibun, son pui cang mai son nyosinie pex, ⁷ canceu pa lih ti koe khawmuik tak mawh pa ih, son tobrie pa eei pex mai son tobriepakoe dauX haktiex pex heue.

Pawie Naog Num Jubili

⁸ “Maix tak simin num ngaix tuah aliah num aliah bawg, bawgyam num tuah aliah num, tak mawh tixpon dim num ka maix. ⁹ Ka dauX khix aliah kao ngaix phlu teettawng pawie naog num Jubili, ka dauX ngaix pa khioxkhaw pa pluatploi pex phimap tix mai pex tak phlu teettawng luah dauX haktiex tix khawmuik. ¹⁰ Maix tak appong num naog tixphan num an mawh num pa singax singeh mai kraih pao krax lawdluan son pui pa ot dauX haktiex an khawmuik, an tak mawh pawie naog num jubili son pex mai pui kukaux tak deehing ka dee koe sinngao cie tix mai ka dee ot paox nyiex tix. ¹¹ Num naog tixphan num an, tak mawh pawie naog num jubili son pex ka dauX num an pex tak ang pon ti rhuat simie, ang pon ti vawg ka nghox pa tang lih kuah mai ang pon ti khrawm plix

siiet pa ang pex nyang cox pawt khankix.¹² Mawh kheu pawie naog num jubili mawh num pa singax singeh ka pex mai pex tak ih ceu pa lih khaing daux kaung daux ma.¹³ Ka daux pawie naog num jubili in, pex tak deeh ing ka dee koe sinngao cie tokaux tix kukaux.¹⁴ Phan pex coh tix ceuceu ka paox plawg tix angah, liag tix ceuceu khaing paox plawg tix angah, pex ang pon ti yeen ka paox tix tix kaux lai tix kaux.¹⁵ Pex simin tix yaox khaix hoik pawie naog num jubili, pex tak liag khaing paox plawg tix awm num pa simin pex ti yaox ka krax lih ceu plix pa ih khankix, nawh tak coh ti tawx an ka pex.¹⁶ Num nie pon pex plix, pex tak yaog ngawh jum nawh mai num iak pon plix pex tak yawm ngawh jum, mawh kheu hoik coh nawh plix an ka maix, awm num pa hoik pon tix plix.¹⁷ Pex tak ang pon kheem pon yeen ka paox tix tix kaux lai tix kaux, viang mawh nan, lhat graung ka Siyiex pex, mawh kheu Aux mawh Simiang Siyiex pex heue.

Grawng Pa Khre Son Num Aliah

¹⁸ “Pex hawt yuh awm been pa deuh Aux khankix mai priex ti hawt awm lox lai beenli Aux khankix mai pex tak yaox ti ot yiienyawg ka daux haktiex an.¹⁹ Haktiex tak tawx plix tix mai pex tak yaox ti ih tomsak mai yaox ti tan ka daux krax pa yiienyawg.²⁰ Phan pex ah nin, kheu ang yix yaox ti rhuatsimie mai khrawm ka ceu plix pa ih khankix tix, ka daux num aliah, yix sang ih patix?²¹ Ka daux liah num Aux tak tawx lox nawb buanson piang pex mai tak kieh ceu plix pa ih kub son pex loe num.²² Pex tak yaox ti rhuat simie ka daux num daix mai ih ka ceu plix pa ih pa prim tom hoek ka daux num dim, tom yam hoek bawgyam khrawm pex ceu plix pa ih pa khraox ka daux num dim, pex tak yaox ti ih ceu plix pa ih pa prim heue.

Grawng Deeh Taoh Ka Sinngao

²³ Ang pon ti coh kieh pui pon ti cie haktiex sijheeng, mawh kheu haktiex mawh cie Aux kheu mawh pex nyosinie mai pui hoek peung mai Aux.²⁴ Ka daux haktiex pa mawh sinngao cie pex, pex tak pon akhwang ti deeh taoh ka

25:35 Pi 15:7-8.

haktiex an.²⁵ Phan puxaik maix lih ti mawh pui pa hot sia mai hoik coh haktiex cie tix tix dahdah, phan doeh paox nyiex nawh deeh hoek ti taoh ka an, nawh tak deeh pon ti taoh ka ceu pa hoik coh puxaik nawh.²⁶ Phan pui pa sang taoh ka an ang koe tix kaux kawx mai phan tokaux nawh deeh pon taoh ka an,²⁷ kieh nawh simin ti yaox ka num pa hoik coh nawh an, kieh nawh dee plud ngawh haktiex ka pui pa hoik coh nawh kah, sonsang deeh mawh haktiex an cie nawh.²⁸ Phan nawh ang nyang pon plud ngawh an, nawh tak deeh haktiex ka daux taix kaw pa liag tom hoek pawie naog num jubili, yam hoek pawie naog num Jubili an tak bheek khaing nawh mai tak deeh hoek ka cao pa prim.²⁹ Phan pui tix kaux coh nyiex ti daux veng pa koe plak daux guh veng, khaix hoik coh nawh nyiex an ka daux tix num, nawh tak pon ti deeh taoh kah.³⁰ Phan nawh ang lai pon taoh ka daux tix num, khaix an nyiex daux veng pa koe plak daux guh veng tak mawh cie pui pa hoik liag sijheeng, tom hoek baux ju doeh ru nawh, an tak ang lai bheek khaing nawh tom hoek pawie naog num jubili.³¹ Phan mawh nyiex pa koe daux yaong pa ang koe guh veng hawt rawb vungviang, tak sawn awm ma kaung, kix tak deeh pon ti taoh an mai kix tak yaox ti kieh bheek ka daux pawie naog num jubili.³² Viang yuh ka mawx kawx, veng ceu pui Lewix mai nyiex pa koe daux veng, pa mawh cie kix khankix, yam mawx angah, pui Lewix tak yaox ti deeh taoh kah.³³ Phan pui tix kaux liag nyiex khaing ceu pui Lewix khaing veng cie kix tak yaox ti bheek khaing daux taix nawh yam hoek daux pawie naog num jubili, mawh kheu nyiex ceu pui Lewix pa koe ka daux veng khankix tak mawh sinngao cie kix daux sinax ceu pui Isarela khankix.³⁴ Viang mawh nan, haktiex ma kaung cie pui hun pa koe daux veng kix, tak mawh pa ang pon ti coh, mawh kheu an mawh sinngao cie kix sijheeng.

Ceuk Rom Pui Hot Pui Shia

³⁵ “Phan puxaik pex tix kaux kaux mawh pui hot sia mai ang lai pon eei tokaux tix sinax pex, pex tak teem eei ka nawh, awm nyosinie

tix kaux ka daux sinax pex, sonsang pon ot nawh mai pex. ³⁶ Paw lai teei rao khaing nawh mai paw lai baox gawp rao ka nawh, viang mawh nan, lhat graung ka Siyiex pex, sonsang pon ot puxaik maix tau mai maix. ³⁷ Maix tak ang pon ti tawx nawh ceuk mau tix, deeh taoh ka nawh mai ang pon ti tawx nawh yaog ceu pa ih sonsang pon lih rao. ³⁸ Aux mawh Simiang Siyiex pex pa hoik viex pex lih khaing meung Ejiptux sonsang tawx meung Khanan ka pex mai sonsang mawh Aux Siyiex pex heue.

Been Dexdawd Mai Siliex

³⁹ “Phan puxaik pex tix kaux kaux, hot sia sinax pex mai coh tokaux tix ka pex, maix tak ang pon ti khin nawh yuh kaing awm siliex, ⁴⁰ nawh tak ot tau mai maix awm pui cang, awm kawncau mai awm nyosinie, nawh tak yaox ti yuh kaing jhaw maix tom hoek bawgyam pawie naog num jubili, ⁴¹nawh tak lih hu khaing maix, tau mai kawncau praix tix khankix mai kix tak deeh ing ka nyiexma tix mai deeh hoek ka haktiex keeing tix. ⁴² Kheu mawh kix kawncau Aux pa hoik viex Aux lih khaing meung Ejiptux, tak ang pon ti coh kix awm siliex. ⁴³ Maix tak ang pon ti kuang mai ang pon yuh pa khin ka nawh, maix tak lhat ka Simiang Siyiex tix. ⁴⁴ Phan mawh siliex simex, siliex sibun maix an, maix tak liag kawncau pui pa ot hawt rawb vungviang maix. ⁴⁵ Lheu khaing an, maix tak pon ti liag ka nyosinie khankix, pa ot sinax maix khawm kawncau nyiexma nawh, pa keh ka daux haktiex maix mai kix tak mawh cie maix. ⁴⁶ Maix tak pon ti kieh kix mawh sinngao pa plud kawncau praix maix khankix khaix maix, sonsang mawh sinngao ka kix sijheeng, maix tak pon cau kix awm siliex, viang mawh nan, phan mawh son puxaik pui Isarela, tak ang pon ti kuang piang paox tix tix kaux lai tix kaux ka daux krax pa khin. ⁴⁷ Phan pui tang ceu angah, nyosinie pa ot dex maix angah, pon ti magmi mai phan puxaik maix pa ot hawt nawh tix kaux kaux, lih ti hot sia mai coh tokaux tix ka nyosinie an angah, ka pui pa hoekti ot hawt dexmaix angah maika pui

25:37 Lih 22:25, Pi 23:19-20. 25:39-46 Lih 21:2-6, Pi 15:12-18. 26:1 Krub 19:4, Lih 20:4, Pi 5:8, 16:21-22, 27:15. 26:3-5 Pi 11:13-15.

tix kaux kaux pa mawh kawncau nyiexma nyosinie khankix, ⁴⁸ khaix hoik coh nawh tokaux tix, nawh tak pon ti deeh taoh ka tokaux tix mai puxaik nawh khankix tix kaux kaux tak deeh pon taoh ka nawh, ⁴⁹ paox nawh angah, kawncau pux kawncau nawh angah, tak pon ti deeh taoh ka nawh, phan ang mawh nan, paox nyiex pa dex mai ru nawh, tak pon ti deeh taoh ka nawh, phan nawh deeh koe mau, nawh tak deeh taoh ka tokaux tix. ⁵⁰ Nawh tak jah tix simin ka num jah ti coh tokaux tix, tom hoek ka pawie naog num jubili tau mai cao pa liag, tak sawn ngawh riang yam mawh nawh pui cang hawt num mawx num an. ⁵¹ Phan num kawncau deuk tomnie, nawh tak yaox ti deeh tawx ngawh pa deeh taoh kix nawh khaing mau ngawh pa hoik liag kix ka nawh. ⁵² Phan num kawncau deuk ngie ceex khaing, tom hoek bawg yam pawie naog num jubili, khaix an nawh tak simin num an khankix tau mai nawh, hawt awm num an khankix, nawh tak deeh tawx ngawh pa deeh taoh kix nawh ka kix. ⁵³ Nawh tak yaox ti ot tix num hoik tix num awm pui cang, ang yaox ti kuang piang nawh daux pa khin. ⁵⁴ Phan nawh ang nyang pon deeh taoh ka daux num in, yam hoek pawie naog num Jubili, khaix an nawh tak pon ti lawdluan khawm kawncau praix nawh khankix tau. ⁵⁵ Mawh kheu pui Isarela khankix mawh kawncau Aux, kix mawh kawncau Aux khankix, pa hoik viex Aux lih khaing meung Ejiptux, Aux mawh Simiang Siyiex pa mawh Siyiex pex heue.

Buanson Pa Cu Nghiet

(Pi 7:12-24; 28:1-14)

26 “Pex tak ang pon ti yuh rieanggrang son tokaux tix, rieanggrang pa saik angah, rong khaox pa mhawm angah, ka daux haktiex pex tak ang pon ti jungsimaox pa hoik saik ka taix tix, sonsang krub tix kah, mawh kheu Aux mawh Simiang Siyiex pa mawh Siyiex pex. ² Pex tak priex ti hawt ngaix tuah Aux mai yungyi ka dee pa singax singeh Aux, Aux mawh Simiang Siyiex. ³ Phan pex hawt grawng lawng khaix been Aux mai priex ti hawt gumlox pingnyap Aux khankix mai hawt ti yuh, ⁴ Aux tak tawx rawm lhiex ka pex, bawgyam mawx bawgyam an, haktiex tak

sang tawx plix tix mai khaox pa koe daux kaung khankix tak lih tix koe plix. ⁵ Kaing pah pex nghox tak sang sidah tom hoek bawgyam pieh plix siiet mai kaing pieh pex plix siiet tak sidah tom hoek bawgyam rhuat simie, pex tak yaox ti ih tom sak mai lawdluan khaing pa lhat graung daux haktiex tix. ⁶ Aux tak tawx pa nhim koe daux haktiex mai ang koe pui pa ghat pex lhat graung mai pex tak yaox ti it mhawm mhawm, Aux tak grheu tobrie pa vao khankix mai pui caox pui caig khaing haktiex pex mai lawm vaid lawm pliah tak ang lai kieh koe ka daux haktiex pex. ⁷ Pex tak pheet pui koeng mai kix tak goh ka lawm vaid lawm pliah sivoie ngai pex. ⁸ Pex phuan kaux tak pon pheet ka pui tixyieh kaux, pex tixyieh kaux tak pon pheet ka pui tixmheen kaux, pui koeng pex khankix tak yum ka lawm vaid lawm pliah sivoie ngai pex. ⁹ Mawh kheu Aux tak kiangiien ka pex mai kieh pex haohhun mai kieh gumlox sijax mukheu Aux kauxcong tau mai pex. ¹⁰ Pex tak ih nghox prim mai kieh thawk pa prim lih kheu jao hoik hoek nghox khraox pa hoik pon pex. ¹¹ Aux tak sum nyiex gox buan Tix daux sinax pex mai Aux tak ang lai seeing ka pex. ¹² Aux tak lailing daux sinax pex mai mawh Siyiex pex mai pex tak mawh ceu pui Aux. ¹³ Aux mawh Simiang Siyiex pa mawh Siyiex pex, pa hoik viex pex lih khaing meung Ejiptux son ang pex lai mawh siliex kix. Aux hoik raig khaox glawm pex khankix mai hoik kieh pex jung see see. ¹⁴ Phan pex ang cu nghiet ka gumlox Aux mai ang hawt yuh awm lox tawm pingnyap Aux khankix, ¹⁵ phan pex seeing ka lox tawm jhawm krai Aux khankix mai phan pex nunai ka been Aux khankix, son ang pex pon hawt ti yuh ka gumlox pingnyap Aux mai yieh laux ka sijax mukheu Aux, ¹⁶ Aux tak deeh yuh in khankix ka pex, Aux tak kieh krax lhat graung koe piang pex mai kieh jhawm saux, saux krawx, saux pa laux ngai mai kieh rhawm pex hoek ka daux pa lauxrhawm pex tak yaox ti rhuat simie ka daux pa giexgoing, mawh kheu pui koeng pex khankix tak ih an. ¹⁷ Aux veeh pakngai Tix khaing pex mai pex tak som

26:12 2K 6:16.

plak sivoie ngai pui koeng pex mai pui koeng pex khankix tak kuang ka piang pex mai pex tak to khawm ang pui tie pheetka pex. ¹⁸ Pex hoik yaox ti kham geu ding dod kawx, phan pex ang cu nghiet ka lox Aux, Aux tak tawx krax ciyang pa nielheu kheu jao phimap pex aliah son. ¹⁹ Aux tak raig ti tik siawp sibrawm pa ting rhawm pex, Aux tak kieh raoma awm rhiem mai haktiex awm tawng lheung. ²⁰ Pex tak uik riang rao giexgoing, haktiex pex tak ang chix tawx plix mai khaox pa koe piang haktiex tak ang chix plix plix. ²¹ Phan pex ang nghiet lox Aux, Aux tak viex krax kham geu hoek piang pex aliah son, kheu jao phimap pex. ²² Aux tak ploi tobrie pa vao khankix laig daux sinax pex mai kieh yuh laux ka kawn praix pex mai tobrie pex mai kieh ceu pui pex nie iak hu sipie mai krax lawng pex tak yiien. ²³ Viang hoik yaox ti kham geu yuh nin kawx, ang baoux cox rhawm tix mai ca kawn tiehfeen ka Aux, ²⁴ Aux kawx tak tiehfeen ka pex mai Aux tak tawx krax pa ciyang ka pex aliah son kheu jao phimap pex. ²⁵ Aux tak kieh vaid lawm pa ot plak sijax mukheu Aux hoek ka pex mai prawng ca ka pex, yam khrawm pex paoux ti tau ka daux veng, Aux tak ploi jhawm saux preng hoek sinax pex mai pex tak lauxleeing daux tawm taix pui pa koeng. ²⁶ Yam Aux hoik gah krax teem priex preem pa ih pex, bun kao kaux tak yuh blah sin ka daux glah ngu tix mu mai kix tak deeh ciang ti tawx blah son pex, pex tak ih mai ang sak. ²⁷ Viang pex hoik kham geu yuh nin kawx, pex ang nghiet lox Aux mai ca kawn tiehfeen ka Aux, ²⁸ Aux tak tiehfeen ka pex ka daux pa kied songrhawm Tix, Aux tak deeh tawx krax ciyang ka pex aliah son kheu jao phimap pex. ²⁹ Pex tak ih nex kawn simex kawn bun tix khankix, ³⁰ Aux tak yuh dee pa krub pex dee lhaong lauxleeing mai raig khu dee tan pa tok pex nyawng bhawng khankix mai taing ti tik tokaux yum pex piang rieanggrang yum pa krub pex, Aux tak seeing ka pex. ³¹ Aux tak yuh veng pex laux mai yieh dee singax singeh pex khankix lauxleeing mai Aux tak ang lai ngheet ka taox nyawng bhawng pex. ³² Aux tak kieh haktiex pex lauxleeing mai pui

koeng pa ot ka daux haktiex pex, tak koe krax daoxdeng ka an. ³³ Aux tak kieh pex prungprang ka daux sinax ceu pui tang ceu, lawm vaid hawt pheet khaix pex, haktiex pex tak mawh pa yi mai veng pex tak hoek krax lauxleeing. ³⁴ Yam hoik yiien pui ka daux haktiex pex, haktiex pex tak gauxrhawm daux singaix tuah Nawh mai pex tak ot ka daux haktiex pui koeng pex khankix, yam an haktiex tak yiien mai lauxlee tix gauxrhawm daux singaix tuah Nawh. ³⁵ Glang bawgyam kawn yiien pui, an tak mawh pa lauxlee tix, mawh kheu ang koe bawgyam yiienyawg daux singaix tuah yam kawn ot pex ka daux veng an. ³⁶ Can pui pa kawn deuk ka daux pex khankix, Aux tak sau krax yaohyee ka daux rhawm kix daux haktiex pui koeng kix, lox luah lhax khaox kawx tak pheet kix to mai kix tak to awm to kix khaing lawm vaid mai kix tak goh khawm ang pui hawt khaix kix tix kaux kawx. ³⁷ Kix tak sideeing mai goh piang paox tix tix kaux lai tix kaux awm to tix ka lawm vaid, khawm ang pui pheet kix tix kaux kawx, mai pex tak ang lai koe siawp sibrawm tix cung sivoie ngai pui koeng tix. ³⁸ Pex tak lauxleeing sinax pui kuceu mai haktiex pui pa koeng pex tak bleet ka pex. ³⁹ Can pex pa kawn deuk an khankix, tak khруп ka daux haktiex pui pa koeng pex kheu phimap pa yuh keeing kix. Kix tak khруп ka daux krax an awm keeing kix. ⁴⁰ Phan kix khioxkhaw pluatploi phimap tix mai phimap yuh keeing kix, kheu pa tiehfeen tix ka Aux mai pa tiehfeen ti ang hu daux krax Aux. ⁴¹ Mawh kheu nan, Aux kawx tak tiehfeen ka kix mai hu tawx kix ka haktiex pui koeng kix, phan rhawm pa ang pat hak tix yeen ti tiem mai rieb ka phimap pa yuh tix, ⁴² Aux tak dohkeud ka sijax mukheu pa yuh Tix mai Yakop, Icak mai Abraham, Aux tak dohkeud ka haktiex an heue. ⁴³ Kix tak prah haktiex tix mai haktiex an tak koe krax gauxrhawm ka daux singaix tuah, yam hoik yi pui khaing dee an, kix tak yaox ti rieb ka phimap pa yuh tix, kheu hoik nunai kix ka gumlox been Aux mai rhawm kix seeing ka

26:42 Yam 28:13-14. 26:42 Yam 26:3-4. 26:42 Yam 17:7-8.

lox tat jhawm prawng Aux. ⁴⁴ Viang yuh nan kawx, yam ot kix daux haktiex pui koeng tix, Aux ang tikvud ka kix mai ang seeing ka kix, awm pa sang khaw kix tix lauxleeing mai Aux ang yieh ka sijax mukheu pa hoik yuh Aux tau mai kix, mawh kheu Aux mawh Simiang Siyiex kix. ⁴⁵ Aux tak dohkeud ka sijax mukheupahoikyuh Aux tau maidoeh ru kix, pa hoik viex Aux kix lih khaing Ejiptux, plak sivoie ngai pui kuceu sonsang mawh Aux Siyiex kix, Aux mawh Simiang Siyiex.” ⁴⁶ In khankix mawh gumlox pingnyap mai lox tat jhawm prawng mai gumlox been khankix pa hoik yuh Simiang Siyiex sinax pui Isarelaix piang gawng Sina khaing daux taix Mose heue.

27 *Deeh Taoh Kawn Pui*

Simiang Siyiex kraih ah nin ka Mose, ² “Kraih ka pui Isarelaix khankix, phan pui tix kaux kaux kham lox sijax ti sang tan ka Simiang Siyiex awm pa tat maix jum nawh, tak mawh cie Simiang Siyiex. ³ Phan mawh jum pa caw maix ti tat son simex tix kaux pa koe ju tixnga num tom hoek tixglaiah num, jum nawh tak mawh tixphan plah Shekhe ka mau dee pa singax singeh. ⁴ Phan mawh sibun, jum nawh tak mawh tixngoe plah shekhe. ⁵ Phan nawh mawh pa koe ju phuan num tom hoek tixnga num, maix tat jum simex mawh tixnga plah shekhe mai jum sibun mawh kao plah shekhe. ⁶ Phan ju nawh koe tix khix tom hoek phuan num, maix tat jum simex mawh phuan plah shekhe mai jum sibun loe plah shekhe, ⁷ phan ju nawh koe tixglaiah num haok plak piang, maix tat jum simex mawh kao phuan plah shekhe mai jum sibun kao plah shekhe. ⁸ Phan nawh mawh pa kied hot sia, sonsang plud ti ka ngawh jum pa hoik tat maix, nawh tak hu plak sivoie cao giex kaing li, cao giex kaing li tak tat jum nawh, awm nawh hoik kham lox sijax, cao giex kaing li tak tat jum. ⁹ Phan pui viex ti tan tobrie ka Simiang Siyiex, can pa tan an ka Simiang Siyiex tak mawh pa singax singeh. ¹⁰ Pa mhawm angah, pa caox angah, angpon ti loh ka tang mu mai phan nawh sang loh, an khawm ra tak mawh pa singax singeh. ¹¹ Phan mawh tobrie pa ang singax mai pa

ang khaw ti tan ka Simiang Siyiex, nawh tak jhi tobrie an ka cao giex kaing li, ¹² cao giex kaing li tat jum an mhawm angah, ang mhawm angah, maix caw ti hawt awm jum pa tat cao giex kaing li. ¹³ Phan nawh simie ti deeh taoh ka an, nawh tak deeh naok ti tawx phuan son tix son piang jum an. ¹⁴ Phan pui tix kaux sang ap nyiex tix sonsang mawh pa singax singeh son Simiang Siyiex, cao giex kaing li tak tat jum son nawh, mhawm angah, ang mhawm angah, maix caw ti hawt awm jum pa tat cao giex kaing li. ¹⁵ Phan kaw pa kieh nyiex tix singax mai simie tix deeh taoh ka nyiex tix, nawh tak baox naok mau phuan son tix son piang jum an mai tak deeh teei nyiex an. ¹⁶ Phan pui sang ap kaung cie tix tix dahdah mawh pa singax son Simiang Siyiex, maix tak tat awm jum simie nghoxkoi pa van nawh, phan van simie tix awmie, jum tak mawh tixphuan plah shekhe. ¹⁷ Phan nawh jah ti ap kaung cie tix singax ka daux pawie naog num jubili, nawh tak yax ti tawx ngawh awm pa tat maix. ¹⁸ Phan nawh ap kaung tix singax, khaix hoik luan bawgyam pawie naog num jubili, cao giex kaing li tak simin num glang sinax pa kawn deuk, tom hoek daux bawgyam pawie naog num jubili mai yawm jum pa tat maix ka nawh. ¹⁹ Phan nawh simie ti deeh taoh ka kaung pa hoik ap tix singax, nawh tak deeh naok mau phuan son tix son piang jum an mai an tak deeh mawh kaung cie nawh. ²⁰ Phan nawh ang lai simie ti taoh ka kaung an mai hoik coh kaung an ka pui tang kaux, nawh ang lai pon ti deeh taoh kah, ²¹ yam hoik luan kaung an daux pawie naog num Jubili, tak mawh pa singax singeh ka son Simiang Siyiex, awm kaung pa hoik tiextu, mai an tak mawh cie cao giex kaing li. ²² Phan pui tix kaux ap kaung pa hoik liag nawh mai pa ang mawh cie nawh, sonsang singax ka Simiang Siyiex, ²³ cao giex kaing li tak simin num sinax pa kawn deuk tom hoek bawg yam pawie naog num Jubili, nawh tak tawx ngawh jum awm pa hoik tat maix ka daux ngaix an,

awm krax tan pa singax singeh ka son Simiang Siyiex. ²⁴ Yam hoek daux pawie naog num jubili, nawh tak deeh tawx kaung an ka kaw pa hoik liag pa mawh cao haktiex, sonsang deeh mawh cie nawh. ²⁵ Maix tak tat jum khawmuik hawt jum mau shekhe pa singax, tixnga Gerax mawh tix shekhe. ²⁶ "Tobrie pa liang ti keh khankix, mawie angah, yung angah, hoik mawh cie Simiang Siyiex, pui tix kaux kawx tak ang pon ti baox deeh tang goih mawh pa singax, mawh kheu an mawh cie Simiang Siyiex. ²⁷ Phan an mawh tobrie pa ang singax, tak pon ti deeh taoh awm jum pa hoik tat maix mai deeh naok mau phuan son tix son piang an, phan an ang lai deeh taoh, tak coh awm jum pa hoik tat maix. ²⁸ Viangyuh ka mawx kawx, krax tan pa hoik tiextu nawh ti tawx ka Simiang Siyiex, ka daux pa koe tix khankix, pui khawm tobrie mai kaung cie nawh khankix, tak ang pon ti coh mai ang pon ti deeh taoh, canceu krax tan pa hoik tiextu nawh kuceu mawh pa kied singax singeh son Simiang Siyiex. ²⁹ Pui tix kaux kaux pa hoik tiextu tix tan lu, tak ang lai pon ti deeh taoh kah, tak pah yum tete. ³⁰ Ceu pa lih khaing daux tiex, kao son tix son, pa mawh nghoxangah, plixkhaoxangah, mawh cie Simiang Siyiex, an mawh pa singax singeh son Simiang Siyiex. ³¹ Phan pui tix kaux simie ti deeh taoh pa mawh kao son tix son an, nawh tak deeh naok phuan son tix son piangan. ³² Mawie angah, pexangah, yung angah, can pa tiang ti hu greem khaox puat pex khankix kao son tix son, tak mawh pa singax singeh son Simiang Siyiex. ³³ Nawh tak ang pon ti chawkicheng, sonsang tawng grawng an khankix, mawh pa mhawm angah, pa caox angah, nawh tak ang pon ti loh ceu an khankix, phan nawh sang deeh loh an khankix, pa deeh loh son an khawm ra tak mawh pa singax singeh, an tak mawh pa ang lai pon ti deeh taoh." ³⁴ Inkix mawh gumlox tawm pingnyap pa hoik deuh Simiang Siyiex ka Mose piang gawng Sina son ceu pui Isarelax khankix heue.